


5563.8
4013
v.2

柏峯集
坤

BERKELEY
LIBRARY
UNIVERSITY OF
CALIFORNIA



栢峯集卷之二目錄

卷二

疏

辭掌令兼請寢臺臣申益彬削版除案之命疏

丁

亥十一月日

附縣道乞免疏

戊子七月日

承駟召在道乞免兼陳釐正祀典疏

己丑六月日

辭正言兼劾順天府使具采五務安縣監林鵬翰

疏

癸巳十月日

乞免本職兼請正選舉用情之弊疏

十六日

論劾持平申致權疏 二十日

請勉進 聖學兼劾吉州牧使李邦鵬疏 甲午正

月 日

請文蔭武三窠均宰郡邑疏 七月八日

請禁奢侈因劾黃海兵使李國賢疏 七月十七日

請馭引儀趙榮約並乞遣罷其時檢擬銓官疏 甲

午十一月二十日

請嚴堤坊杜後弊疏

擬疏

啓

論正言朴宗彥啓

癸巳九月二十四日

詣闕避嫌啓

序

送李生子東歸錦湖序

記

杏亭記

東臯亭記

慶餘齋記

歌孔村小記

論

王褒嵒紹孰賢論

孔明不事獻帝論

子死不哭論

堯不誅四凶論

射殺花藥夫人論

人力可以奪造化論

史記在山川論

義

素履往

曲禮

乞言

許嫁纓

常視母誑

曲禮

說

易雌雄說

祭文

遣仲兒告親山文

月城山祈雨祭文

代本倅作

觀仙窟祈雨祭文

牛膝峙站舍開基祭文

雜著

黑山記

海南日記

附祭文

附錄

行狀

墓碣銘

墓誌銘

栢峯集卷之二

疏

辭掌令兼請寢臺臣申益彬削版除案之命疏

丁亥

十一月日

誠惶誠恐頓首頓首謹百拜上言于至行純德英謨毅烈
章義弘倫光仁敦禧體天建極聖功神化主上殿下伏
以臣以遐鄉屏蟄之蹤有事先壠來近畿輔得伏聞以臣
爲司憲府掌令除旨之降已至多日臣感激惶懼罔知攸
措揆以分義不敢遽還鄉廬昨纔來伏城闥而念臣知識
魯莽言議巽軟雖在冗司漫局尚多僨誤之憂至放清朝

言責之任尤非一分近似於臣身者況伏聞近日以來以耳目之聾瞽屢發中朝之歎聖意藹然至有期責耳目之意則臣受任此際其何以稱塞萬一以示我殿下虛行之盛意也哉臣之難進之義於是益著雖校慢命之誅凌不可冒沒承膺矣且臣以苦塊餘喘莖存軀殼形瘠神耗世念都灰而曾在南邑重傷水土咳嗽痰癖之症轉成難醫每當寒節如期輒發今於路中添得輪行毒感痛情尤苦氣息喘喘委伏旅舍食飲全廢以此病狀萬無供仕之道揆以公格既有難冒之義念以私情又有必遞之端茲敢隨牌詣闕略控短章伏乞天地父母特許鑄改以安

私分以重官方不勝幸甚臣於乞免之章不宜贅及他說
而事在目下有難終默冒死尾陳伏願 聖明俯賜裁察
焉日前臺臣申益彬之疏論數件事實出於眷眷憂愛之
忱則其在容直納諫之道固當采擇而嘉獎之乃反責之
以氣銳加之以威罰臣竊以爲過矣申益彬削版除案之
命特爲還寢以爲激礪朝紳開廣言路之地臣無任屏營
祈懇之至謹昧死以 聞

附縣道乞免疏

戊子七月日

伏以天休滋至寶筭彌隆邦慶無前縟儀載舉臣民慶忭
曷有其極臣於病伏鄉廬之中忽伏承栢府除命繼以駟

召遠辱榮生蓬華瞻聆動色如臣無狀何以獲此驚惶感激固當踴躍趨承之不暇而第伏念臣素患伏暑之症當此亢炎益肆危毒食飲全廢氣息繭縷委頓床席忱誠莫遂於崇呼之班沉淹時月罪戾尤重於逋慢之科怵分畏義莫覺措躬之無所扶曳病軀寸寸前進日昨來抵于振威地而所苦諸症越添於冒炎跋涉之餘頭疼膏痞肺虛胃敗重以添病登溷無算真元漸掇神精昏泮以此病情萬無強疾遭程之望茲因縣道略暴危懇臣罪至此萬殞難贖伏乞 聖慈俯垂諒察亟賜威罰以安私分以昭法網千萬幸甚

承駟召在道乞免兼陳釐正祀典疏

己丑六月日

伏以臣空疎淺劣最居人下而幸遭聖世累叨言地涓
埃莫報居常愧懼矣卽者新除職名忽下放病伏鄉廬之
中繼以駟召遠辱諭臣以斯速上來榮生蓬華瞻聆動色
如臣無狀何以獲此驚惶感激固當跼蹐趨承之不暇而
仍伏念臣素患泄痢之症當寒添劇委頓床席食飲全廢
以此病狀萬無攢進之勢而恩諭之下不敢言私扶曳病
軀寸寸前進日昨來抵于陽城地而所苦諸症越添放冒
寒跋涉之餘寒熱互作肢體疼痛神昏氣短蕭然欲盡倘
或不顧病勢強力登程則實有生行死歸之慮故茲因縣

道略暴危惻臣罪至此萬殞難續伏乞 聖慈俯垂諒察

亟賜重勅以爲人臣慢命者之戒焉臣於乞免之章不宜
贅及他說而第有區區所懷敢此叨瀆伏願 聖明試垂
察焉有國所重在於祀典我 聖上誕膺景祿必篤誠敬
凡於享祀之節儀文感傷卓越千古至矣盡矣至於八路
校祀所用幣脯曾有釐正之議而尚今因循者大焉 聖
世之欠典夫苧用白尚其潔也脯用中取其正也先王朝
養神尊聖之制猗歟盛哉既有成憲則廟祀校院宜無異
同而內而太學一道成憲外而各邑則不然所用苧幣每
因土產之不齊隨處苟充或代以綿木或代以麻布鹿細

長短各自不同至於享脯亦由宰手之不備猝辨條脯常
患其駁雜或致其腐傷厚薄尺度全不成樣春秋奠幣之
時每有儀不及之患左右薦豆之際實多割不正之歎事
體苟簡殊欠敬謹此豈爲 聖朝精禋之本意也哉故大
司成臣洪錫輔筵稟定奪改爲京賀而乍行旋撤故禮判
臣李鼎輔復以法意之顛倒士論之嗟惜陳達前席而蒙
嘉納將成節目之際適值朝家之有事尚不得舉行此乃
前日旣釐之事已成之目也外方幣苧與享脯當自太學
分送泮隸於各道都護官精備取用而一遵京司所供規
禮則幣無不齊之患脯無不潔之歎而其於享祀允合典

禮而其在經費亦無所損且今春大僚以重祀之意請改各邑祭器祭服既蒙允許矣器與服之渝弊已許改新而幣與脯之欠潔尚靳釐改臣竊爲未安也及今祀典修舉之日此事爲當今第一急務而朝廷之上無一人言之者臣不勝慨然每欲一陳於絀續之下者久矣連在鄉曲含意耿耿今幸適當言責是臣進言之秋敢此附陳於疏末以備 聖上之裁擇伏乞 聖明俯念享祀之至重斷自宸衷亟令各邑就較校院幣與脯一依太學進排所用例釐正節目永久遵行千萬幸甚

辭正言兼劾順天府使具采五務安縣監林鵬翰疏

癸巳十月一日

伏以寶筭彌隆玉候康復聖慕益切於前休緝儀將舉於
舊宮臣民慶忭之忱曷有其極仍伏念臣才識魯莽言議
巽劣本不合於清朝耳目之任而猥蒙恩私濫通臺啣累
叨言責一無俾益心常愧悚若殞淵谷今此薇垣新命實
出格外臣何敢冒沒承膺而祇緣分義惶悚章皇出肅一
次登筵獲瞻焯光區區愛慕之誠自出於秉彝之天非不
欲逐日詣臺以進芻蕘之說而臣素抱痰嗽之症僂成癰
痼近又添輪行感氣咳嗽大發氣息凜綴私室之間汗漫
說話亦不能酬應其何望筵席姿對乎況今動駕有日而

陪扈無路尤不勝惶感之至邦慶無前賀禮將行凡在跋
蹙之類莫不鼓舞之辰冒入文字自速罪戾極知猥越而
左右思量以此病狀萬無隨行之勢茲敢疾聲呼籲於天
地父母之下伏乞 聖慈特垂矜憐亟賜鐫削臣職名仍
治臣瀆擾之罪以肅朝綱俾安私分不勝萬幸臣於乞免
之章不宜贅及他說而以目下數事尾陳伏願 聖明垂
察焉臣嘗聞經曰天視自我民視天聽自我民聽天之視
聽雖曰冥冥而只自於吾民之視聽矣守令之不得其人
而民怨朋興則亦足以上干天心而爲災異之應矣外方
治績之臧否未得詳聞而以尤甚最著者言之順天府使

具采五荏位二載無一害故春間稅穀之裝載也以一千九百石米濫載於一船卽其境內旋爲臭破略干拯出分給民間以還米那移改色苟充其數晚時上納還米則勢將徵捧於民間當此歉歲惟正之貢應納之還亦難辦出於貧民况白地再徵乎恐聲載路傳說狼藉如此之人不可置之於字牧之任臣以爲罷職可也務安縣監林鵬翰頃因臺論有拿處嚴問之下教而臣於昨冬行過該邑有的知所聞故敢此仰達矣林鵬翰去年八月到任而其邑有積年陳腐還米七百石稱以改色分給民間一石之出不過五六斗以五六斗米分給於八月而以十五斗倍徵

數月之後豈無貧民之呼怨乎設令前官不能用舊畜新
留任陳穀不可不變通則待明春窮乏之時從民願分給
尚未晚也而何必到任屬耳急急勒分於秋穀已登之日
以招民怨哉推此一事他故可知臣謂鵬翰先罷後拿可
也營將之任專在禁盜而洪州營將李彥邦不能明察治
盜之際或有玉石俱焚之歎且以本道之人其家不遠於
該營渠之一宗親舊推奴徵債挺身擔當多發將校橫行
閭里一境嗷嗷所聞駭然不可不論彥邦特施譴罷之典
宜矣當今第一憂慮者莫過於言路之閉塞而其所以言
論閉塞者莫非羣下之罪也我 殿下以周文不諫亦入

之姿懋殷湯從諫弗拂之德蕩滌滌舊紙欲聞新啓之言耳
目喑啞每發中朝之歎容直之意求言之誠藹苑於絲綸
之間今日之出入臺地者孰不欲出言論一事以效報塞
之忱而目今世界以無事爲先務一請問備則顯示愠怒
官師相規則視若仇讐至於蹤跡之沮悟者言行之未著
者除旨纔下浮言胥動非情之責求全之毀比比有之當
之者亦瞻前顧後畏首畏尾終至於含墨者勢所然也如
欲言路之洞開則當申飭銓曹另擇臺望使地望俱備之
人強圉不屈之士布列臺端則嘉言善謨可得日進於前
民憂國計日聞於上都俞吁拂之治復見於今世矣此亦

消災之一端也洛陽東村昔在全盛之時素稱繁華之地而近年以來蕭條漸甚蓋緣朝市稍遠生利鮮小民不樂屋次第散去或有毀撤家舍作爲田圃互相買賣以賭一年之利雖或有願爲作舍者堡主不無阻擋舊日樓臺之地半入蔬菜之場殆非所以資飾太平之氣像也十餘年前大駕之歷臨於義宮也特軫宮底閭閻之稀疏至有設厯厚生之盛舉而行之數年旋爲停廢若此不已東村一壑將未免空虛誠爲可悶伏望申飭該部采用可居之處嚴禁起耕勸入人家以期比屋至於依賴保護之道令廟堂從長變通斷不可已也

乞免本職兼請正選舉用情之弊疏 十六日

伏以臣之病情略陳於頃日祈免之章想或 聖朝之俯
燭而原來臣痰咳之情乃數十年貞疾也每當寒節如期
必作重歇無常開春收愈近日冷氣雖不甚緊而猝添輪
行感氣危篤之狀比前十倍若似無故養閒之人則實無
頃刻蠢動之勞矣臣年前草土之後既失怙恃而所以怙
之恃之者惟我 殿下而已至於筋力奔走之事雖十顛
九仆盡瘁後已者是臣區區之願而若夫言責之任則天
威咫尺之下敢論是非之說責對之際咳喘大發則有不
可以嚴畏敬謹而禁其聲其爲褻慢實有關於臣分此臣

所以彷徨踖蹢不敢爲進身之計也向叨監試之命義同
往役不敢言私逐日往來觸冒風寒種種危劇不一而足
昨日詣闕脩門已閉不得反面退伏旅舍終宵叫苦以此
病狀萬無復命之路茲敢不避猥越略陳肝膈之言伏乞
聖明俯垂諒察亟賜鑄遞仍治臣逋慢之罪以肅朝綱
以安私分不勝幸甚臣方乞免不宜拖及他說而事在目
下略此附陳向者諫長以科弊有所陳啓而臣又有愚見
焉試事之不嚴莫若近日科榜一出辭說紛然雖未必盡
如浮囂之言而爲考官者苟能恢其公道爲士子者亦能
恥其躁競則豈有是囂囂之言哉今此慶科旣有所重昨

下傳教又復嚴飭臣無容覈事煩陳而第謬習已痼私意
橫流捧券之際不無弄奸之端分軻之時每多用情之患
事之寒心莫此爲甚臣以謂另擇考官嚴加申飭俾無如
前雜亂之弊可也目今人心陷溺之時子弟多暴之歲禁
盜一節不可不申飭也近者新門外士夫家有四五賊漢
乘夜突入拔劔恐喝奪家藏無異強盜都城咫尺有此
竊發之患而仄聽多日終無譏捕之舉捕廳設置之意果
安在哉臣以爲當該大將特施譴罷之典斷不可已也

論劾持平申致權疏

二十日

伏以臣之再度控章引病祈免蓋出於疾痛呼父母之義

而反承批旨每以勿辭察職爲教此實臣誠意未孚之致其爲愧慙尙如何哉分義惶悚雖不敢更爲乞解而顧臣病情日漸危篤詣臺無路職名虛縻尤不勝惶感之至茲於召牌之下實無進身之勢敢陳自訟之章兼附目下之言以效一日之責伏願 聖明垂察焉凡臺閣之論人長短得失者務歸公平然後可以厭服人心而向日申致權之論罷前吏判也至有歷數諸人用意排擠之舉臣以是不勝訝惑也伊時銓官不善周旋去就之際政注之間不無礙眼處人言之來無足恠矣而至於 聖母之至親先正之後孫既有錄用承傳則一命之官實出公議夫孰曰

不可而乃於指名奏對之時必以此兩家之人謂其銓家
族之族混同歸之於循私之科苟有一分公心豈忍爲此
等十手所指之事耶雖緣急於陷人有此駭舉而敢於莫
重筵席語不擇發如此臺禮前所未聞其在官師相規之
道不可不論臣謂前持平申致權亟施譴削之典勿復檢
擬於臺望斷不可已也

請勉進

聖學兼効吉州牧使李邦鵬疏

甲午正月

日

伏以歲籥維新玉候彌康元日祇謁 聖懷克伸羣情胥
悅曷有其極仍伏念臣才識魯莽言議巽劣本不合於清

朝耳目之任而向叨諫職黽勉行公一次登筵三度陳章
莫非罪戾之自速而奔走之餘宿病添苦賓對有命不得
承膺至有憲長請削之舉至今追思惶愧無地臣於伊時
病情危劇之狀實是輿僮之所共知而必爲歸之於無故
違牌之科聲罪狼藉此乃臣平日言行不能見孚於同朝
之致自顧醜然只事縮伏今此除旨實出望外去就一節
初無可論而適當歲除之日分義惶悚章皇出肅至登筵
席而仍因蹲冒有關廉隅茲敢略入文字仰暴微懇伏乞
聖慈亟賜鑄改之恩以重公器俾安私分千萬幸甚臣放
乞免之章不宜贅他而區區憂愛之忱出於秉彝之天茲

將陳芻蕘之說敢效新年之祝伏願 聖明垂察焉臣謹
按國語衛之武公年九十有五猶箴儆于國曰自卿以下
至于師長士在朝者無謂我老耄而舍我必恪恭於朝以
交戒我遂作抑戒之什而以自警又著賓慈之篇而悔過
其有文章而能聽規諫以禮自防者可知矣唯我 殿下
膺唐堯倦勤之壽懋夏禹惜陰之德 殿下之壽姑未及
於武公而 殿下之德實無讓於武公曾以淇澳綠竹命
題於策士之日臣深仰 殿下愛慕武公之盛念也臣請
以其詩之意爲 殿下誦之大學傳曰如切如磋者道學
也如琢如磨者自脩也瑟方澗方者恂慄也赫方喧方者

威儀也有斐君子終不可諼者道威德至善民之不能
忘也伏願 殿下念茲在茲越今歲色之夏新克圖 聖
德之曰新典學之方非不至矣而益加切磋之功自修之
道非不盡矣而益勉磨琢之功窮敬之存乎中而無怠惰
慄之度光輝之發乎外而克慎威儀之節則自底於德之
盛善之至而民將心悅誠服不敢頃刻忘于懷矣宣不休
哉臣伏見漢史文帝有詔曰方春和時草木羣生皆有自
樂而哀我鰥寡孤獨貼於危亡其議所以賑貸之此實達
牒之美事也我 殿下勤勞於厦氈之上惻怛於絲綸之
間五十年如一日者只爲民事而適值三南之告飢方切

九重之殷憂廟堂講究之策想必得矣外邑賑濟之資想必備矣而當此三陽開泰萬品向榮之辰節屋之愁歎尤不可不念也生靈殿屎尤不可不恤也伏願聖上深推視傷之恩亟下勉飭之諭使方伯守令盡心設賑俾無一民捐瘠之患是臣區區之望也且臣伏念近歲以來芻牧之實惠未究黎元之困瘁益甚此專由於守令之不得其人矣政注差遣惟以計仕循次爲務至於簡拔茂才擢授劇邑如漢唐漿廉吏用良牧之規則絕無聞焉是我聖上眷眷憂民慎擇守令之教終無實效也臣謂使備局諸堂每於歲首各薦才堪爲牧者一人而大臣就其中愛加

抄擇啓下銓曹不拘常格以備調用如甲申前例則其於
儲望需才爲官擇人之故必有其效此非創出新格實是
修明舊典也前後臺臣或有以此陳情者而徒歸文具未
見實效亦願 聖明留心採施焉嗚呼百里之任固當另
擇至於邊上重地尤宜審慎而吉州牧使李邦鵬三載居
官一事貪淫搜括峽氓以充漁戶之役而山民座首憑藉
方物以豐肥己之資海鎮蹙額罷妓干預放獄訟而貨賂
公行猾吏橫行於閭里而徵斂無厭其他政令之狂悖刑
杖之濫酷罔有其極傳說喧藉所聞駭然如此之人不可
以迎送之多弊而有所容貸臣謂吉州牧使李邦鵬亟施

削版之典斷不可已也臣無任云云

請文陰武三窠均宰郡邑疏

七月八日

伏以天休滋至稱慶之舊甲重回聖慕克伸呼嵩之餘
得儀載舉臣民歡忭大少唯均仍伏念臣愚魯無似最居
人下耳目之重任自知不稱而有懷無隱只服古人之訓
而已有除必膺只效臣子之分而已其何能出一言論一
事以補清明之治哉蓋緣感激洪造躅蹐爲恭在職一日
則盡一日之責在職二日則盡二日之責是臣區區之願
而向叨見職詣臺之際得聞宗班兩人互相陳章見阻於
喉院傳笑於輿臺沒不可置之度外故果以目下所見有

所論啓矣及承

聖教誨責截嚴至有受囑見欺之教臣

至今追思萬萬惶悚直欲鑽地以入而不可得也以臺臣
犯受囑之科以人臣負欺君之罪則何可一刻容恕於覆
載之間歟今此除旨實出夢想之外而以臣情勢萬無承
膺之望且臣素抱痰咳之症越添於職事奔走之餘食飲
全廢氣息慄綴時月之內實無起動之勞茲敢略具文字
冒死仰籲伏乞 聖明俯賜鑑諒亟削臣職名仍治臣前
日妄言之失以肅朝綱以安徽分千萬幸甚臣於乞免待
勘之章不宜贅他而臣伏見近日傳教則求言之誠藹藹
於絲綸之間至有代撰應旨之諭今日之以臺爲職者孰

不感動以忠報效之道哉敢陳狂瞽之見悉暴憂愛之忱
伏願 聖明垂察焉伏惟我 殿下體唐堯欽明之德膺
唐堯耄期之壽甲辰卽位旣同於前後康衢聽謠無間於
今古則左海天地卽唐堯之天地也青丘日月卽唐堯之
日月也況以大堯之聖猶有病瘳之歎而 殿下之惠澤
旁流初無一夫之不獲以大堯之德猶有倦勤之憂而
殿下之夙宵靡懈克致萬機之畢舉雖謂之賢於堯實非
諂諛之言而竊以臣忝室之忱不無訝惑於心者請爲
殿下條陳之欽若四時堯之所以則天而寒暑之失節水
旱之示警未有甚於邇年平章百姓堯之所以化人而詆

俗之澆漓士習之躁競未有甚於近日利用厚生大堯安
民之政而目今節屋之下黃口充丁之恐白骨徵布之弊
可見困瘁之益甚矣投珠抵璧大堯崇儉之德而目今閭
巷之間苧羅儂身之具雕峻潤屋之飾可見奢侈之成風
矣廟堂之謨猷空疎而臯夔稷契之輔難復見矣臺閣之
嗜啞成習而都兪吁咈之盛難復聞矣推此數事而言之
殿下之德與壽并美於唐堯而殿下之治猶不及於
唐堯者何哉臣竊謂大堯所以做寬湯熙皞之治者不過
出於精一執中之心法也臣愚死罪恐未知我殿下
心上操舍之功或未臻於精一執中之域而然耶伏願

聖明捨五十治平之運追九十箴儆之意先正一心之微
俾作萬化之原凡於故令施捨之間動靜威儀之節必思
惟精惟一允執厥中之道則天心悅豫而災異消滅矣民
俗昭明而淳風挽回矣字惠困窮而囿萬民於春臺之中
矣禁抑浮華而躋一世於撲素之域矣知人善任才不給
於異代而臯夔稷契之輩登于朝矣翕受敷施言必進於
王前而都兪吁咈之美書于史矣以至于百工允釐庶績
咸熙將不讓於唐堯之世庶可見德業之愈光而治化之
益隆矣豈不休哉且臣以目下數事有所憂歎者敢此尾
陳焉伏念我國家用人之路文蔭武三岐而已文而資黼

黻之猷武而作干城之具蔭而責字牧之任其制度之宏
遠規模之纖密猗歟盛哉是宜千萬年傳之無弊而臣竊
怪夫古之官方內重而外輕今之官方外重而內輕滔滔
一世爭慕百里之榮者其故何也是豈今人不及古人而
然耶蓋由於事勢之不期然而然耳夫今世之科榜拔身
者誰無致澤君民之心而其間亦不無口腹之計門戶之
策矣近年以來科目歲增人才薪積或調郎十年而終未
得斗邑或進身三司而終未得薄縣經幄論思之臣不免
桂玉之愁臺地出入之人率多凍餒之憂至於廉吏有乞
飯而供仕者銓郎有徒步而就直者瞻聆所及足可見世

道之寒心而若夫遐鄉踈迹之蹤抱紅牌老死牖下者不知何限安得無奔競之成風寬鬱之干和也哉前後臺臣之以此陳達者多矣或事下備局而竟作休紙或特賜嘉納而復同文具終未得其踈通之道臣竊慨然也臣伏見殿下每於大故親臨之時必引漢帝應列宿宰百里之言申申下教而文官之以郎署出宰者十餘年內絕無而僅有夫以郎爲官初無文蔭武之別則應列宿宰百里獨可責之於武蔭而不及於文臣歟殿下愛恤元元一心憂勤者只在於守令之得其人而目今近千文官許多潦倒之中亦不無黃龔杜召之才則在旁招俊乂之道不可

偏用武蔭矣嗚呼我東州縣三百有六十而其中文武交
違者三十餘窠以武臣差出者八十餘窠其餘一百九十
餘窠皆以蔭官而差出者也銓官注擬之際一從故格移
易不得故文臣差出處武備有疎虞之弊武臣差出處則
文治有闕略之患殆非所以弛張并用之道而至於蔭官
亦未必人皆循良則何可永作南行之窠而不思所以推
移之方乎且夫六鎮諸邑自有文武交違之法而挽近以
來一任武弁氓俗貿貿未沾聖化之彬鬱我殿下於
變時雍之治獨不可行之於外地歟以濟州願見文字觀
之亦可想六鎮之民願見文治矣且經曰三載考績三考

黜陟幽明我朝殿最之規三載之間實經五考則亦可
黜幽而陟明矣爲吏之法手熟則心急事陳則弊生六年
之窠不可不釐正矣夫義州東萊旣關於事大交隣則不
可不以文臣鎮撫者也至於防禦使實有閫帥之階梯中
間變通設置法意攸在而近年以來人多窠窠爭競莫甚
適足爲武臣稱寬之資而亦一當今之弊端也苟有制閫
之才則何必拘於防禦之履歷哉防禦使六窠不關於有
無矣臣謂東萊義州外其他牧府郡縣並作三年窠以文
武蔭輪回差遣永爲不易之典則行之數年各得其職無
淹屈沉滯之歎矣此乃朝政之大要張國事之大變通如

臣螻蟻之賤妄陳芻蕘之論極知僭越無所逃罪而係是
當今之第一先務故敢此申告伏願 殿下勿以人微而
廢其言也且伏見近日諫長以都事弊端有所陳達而臣
又有愚見焉夫都事者藩臣之幕賓外方之兼臺其所分
職責任不輕而十數年內僂作冗官可勝惜哉當初磨鍊
捧祿足可爲支供之需而或會簿於本官或照管於上營
以爲自家之囊橐而稱以迎送有弊初無夫馬之來待間
或有因公赴任者而監司守令看作不速之客纔留數日
顯示厭薄之色坐席未暖罷狀旋至其何能久莅位所以
佐觀風之攸哉無勢之人積年勤仕僅得郎署而一經是

官殆同禁錮此亦減傷和氣之一端也伏願 聖上申飭
銓曹以文望俱備之人各別擇差依各道虞候例使之受
其常廩準其瓜限以爲內擬之塔梯則可無如前之弊而
是亦爲官擇人之道也臣無任云云

請禁奢侈因劾黃海兵使李國賢疏 七月十七日

伏以臣之除拜見職已多日矣陳懇承批之後卽當出謝
恩命而第臣所患諸症一向危劇咳嗽之甚而言語不通
喘促之急而精神間迷以此病狀萬無詣臺之路鎖日縮
伏自速罪戾惶悚之忱曷有其極別無難安之端可言則
言可默則默昵近耿光榮旣極矣謄傳故紙責亦塞矣苟

有一分可強之勢何必逡巡於去就之際哉貞疾既瘵蠢
動無期職名虛帶逋慢莫甚臣分虧矣情勢窮矣茲敢疾
聲呼籲於仁覆之天伏乞 聖慈俯垂矜憐亟賜鑄削之
恩以肅朝綱俾安私分千萬幸甚臣於乞免之章不宜贅
他而顧臣處義其身既不能進並與其言而不進則恐負
平日報效之誠矣敢陳目下數事以暴憂愛之忱伏願
聖明垂察焉臣待罪鴻臚陪扈銅闈殆近四五朔矣我
邸下英睿之姿儼然成德周旋之節秩然中矩臣有時瞻
仰恒切愛慕之忱方今睿學有日就之功肅明有月將之
效此正夏禹惜寸陰之時也書筵不可一日而停掇也講

官不可一日而曠闕也簡拔文雅有識之士巡訪德望俱備之人彬彬登筵濟濟侍坐講習而討論之啓沃而薰陶之前後左右罔非正人動靜云爲罔非正道則睿德之成就可期於堯舜矣伏願 殿下申飭銓曹春坊多貢各別擇差隨其有關而爲填代以爲輔導涵養之方誠當今第一先務也且伏念今日之民窮財竭實由於奢侈成風若不及時而堤防則末流之弊有不可勝言矣人家子弟婚時禮弊一自禁紋緞以後非毛緞廣織則謂之品劣而不用視諸紋緞反爲極奢至於髭髻尤爲務勝一髭所需殆近五六百金之多一人行之千人效之京華唱之鄉谷應

之或有職此而家舍斥賣者或有坐此而嫁娶愆期者瞻
聆所及極爲可駭以萬乘之尊四海之富猶惜露臺百金
之費而况私家首飾空費五六百金而不知惜焉豈有如
許道理哉柳公綽之纈絹木奩鮑宣之短布鹿車留作後
人楷範若使世人之爲家長者苟有柳公綽鮑宣之所見
則獨不愧於人乎禮而無節則亂財而無節則窮故宋臣
司馬光有言曰吉凶之費皆有品節裁省冗費禁止奢華
誠格語也我 殿下躬儉之德導率之方可以風動四方
而俗尚之乖漓月異而歲不同識者之憂歎曷有其已惟
此禮幣鬕髻不可不爲先變通臣謂從今以後嚴立科條

雖公宰家婚幣首髡之費從略定式或有如前濫奢之弊則各其家長隨現論罪斷不可已也武臣之貪驕無忌近來尤甚誠非細慮黃海兵使李國賢曾在統營多行不法至有交承之人以捕將望當拔之意大言於備局稠坐之中此可謂一世之公案矣及莅西閩不悛舊習恣意侵虐刑杖之濫椎剝之酷無非招悉之政一營嗷嗷傳說狼藉如此之人不可置之於制閩之任臣謂黃海兵使李國賢特施譴罷之典宜矣臣無任云云

請汰引儀趙榮約並乞譴罷其時檢擬銓官疏

甲午

十一月二十二日

伏以臣情病俱苦初無可論於臺閣去就而適值試牌冒
膺恩命蓋出於義重往役不敢言私而因仍躡冒斷無是
理茲敢略入文字敢暴微懇伏願 聖明垂察焉臣於秋
間見叨是職以經旬不謝恩致有叔問之舉至今追思悚
惶無地臣於伊時實病沉重詣臺無路旬日之內再度祈
免尾附數條至蒙開納則揆以事理與無故逡巡似有差
間而臺臣之發啓喉院之現告適在於臣出肅之日臣且
惶且惑莫知其故而自顧處義實爲難安之端且臣素患
咳嗽已成貞疾當此寒節如期復發諸般危症逐日增加
以此病狀萬無供仕之望茲敢疾聲呼籲於仁覆之下伏

乞 聖明俯垂矜憐亟削臣職名仍治臣瀆撓之罪以肅
朝綱俾安私分千萬幸甚臣於乞免之章不宜贅及他設
而竊有區區愚見敢此尾陳焉夫國家用人之道雖徵官
末職固當另擇而引儀趙榮約賦性狂妄言辭悖戾見棄
於儕流而一自甄拔之後使氣逞惡無所顧忌如此之人
不可置之於衣冠之列臣謂趙榮約特施刊汰之典其時
檢擬銓官亦宜爲謹罷斷不可已也臣無任云云

請嚴堤坊杜後弊疏

伏以皇穹不吊賓馭莫攀考妣如喪臣民均慟居諸邇邇
因山奄過伏惟孝思益復罔極仍伏念臣自來情勢實無

束帶抗顏之望而掌憲除旨忽下放縮伏訟愆之中臣且
惶且感罔知攸措怵畏義分章皇出肅而因仍蹲冒斷無
是理茲敢略入文字粗暴情私伏願 聖明垂察焉臣於
年前獲叨是職妄論引儀趙榮約而以不成言議臺啓峻
發至被削版之典臣到今追思愧忸深切且有悚地之危
苦者夫榮約泰億之從孫厚賊之私人也元來釁枳之蹤
遽爾吹噓拂拭復置衣冠之列雖是微官實關公議臣之
一疏盖出於此而遣辭之際只言其賦性之狂悖行事之
縱恣別無拖及他說矣伊日入侍承旨乃於奏對之際敢
售護黨之惡習強援復官之逆相隱然有搆捏臣身之意

其心術之不正筵體之無嚴莫此爲甚設令臣疏顯有擢
斥廢族之意思職在惟允者何敢以言外之旨肆然陳達
以爲傾軋之計哉當是時也厚賊嘖笑之間殺活立判而
如臣愚騃妄率甘自得罪彼所以承順厚賊之風旨而直
欲驅臣於罔測之地也幸賴聖明之俯燭董免鈇鉞之
嚴誅而聽聞所及不覺骨寒而心顫也何幸乾道孔昭義
理不泯巨魁旣勘當律餘黨想或小戢至於當該承旨營
護凶孽之罪不可不查現重繩以爲嚴堤防杜後弊之端
而恐有反詈之嫌敢效自引之義伏願聖上俯賜鑑諒
亟削臣職名仍降威罰以快人心俾安私分千萬幸甚臣

於乞免之章略附沐浴之義嘻噫痛矣亂臣賊子何代無
之而豈有如今日之式繁其徒指不勝屈哉莽操懿溫貫
千億所無之惡而今般諸賊之惡有浮於莽操懿溫焉輝
鏡夢亘古今莫大之逆而今番羣凶之逆殆甚於焉輝鏡
夢天何故生此許多妖孽以亂我 聖朝清明之治哉太
陽光臨魑魅莫逃乾斷廓揮霜雪無私前後鞠案端緒畢
露大小諸逆次第伏法至有上告下布之舉輿情憤苑從
此小洩宗社之慶幸庶幾無疆而第伏念天地之大不能
無憾日月之明猶未盡燭逆謙之母偃處地上賊尚之子
假息宇內已是失刑之大者若夫養厚兼濟之爪牙放厚

賊秦淵章吾之羽翼於厚賊者亦且一向寬貸未加顯戮
是豈羣下之所以仰望於 殿下者哉伏願 殿下亟加
三患凡係逆黨之尚在簿勘者一并施其當律一以雪神
人之憤一以爲國家奠安之謨焉且伏念我 殿下新服
丕基適追先志雖在哀疚攀擗之中而克懋彰瘅黜陟之
政剪除逆黨肅清朝著環東土數千里愚夫愚婦孰不翹
首跼足想望至治也我是以芻蕘之說無不採納臺閣之
言罔不翕受其於嚴懲顯討之典屈法伸恩之際處分嚴
正辭旨懇惻動合天理普洽人情臣放此有以見 聖學
高明無施而不得其當也第念鳳漢之尚今容貸臣實訝

之蓋鳳漢罔赦之罪已悉於前後請討之章臣不必枚舉
疊床以憾我 殿下至仁至慈之心而顧其負犯至重昭
布四方之耳目則正所謂國人皆曰可殺也 殿下每於
此等之言輒下非常之教惻怛之意哀痛之情藹然於絲
綸之間今日北面於 殿下者孰不欲仰體 聖念敦親
之化而罪大惡極輿情益激則其於一國共公之論何哉
茲敢不避鈇鉞枚陳愚見伏願 殿下穆然深思亟賜處
分焉抑臣有區區淺見我 朝數百年來鎮安人心維持
世道者只是戊己辛壬之義理也爲人臣子者不知戊己
辛壬之義理則是夷狄也禽獸也不幸亂逆近出世族相

簡恒烈之密發玄論而戊己之義理幾晦厚謙獐漢之阻
遏代聽而辛壬之義理幾墜驅一世簪纓之家殆入於夷
狄禽獸之域此臣所以尤爲痛惜者也何幸一宮僚之竭
誠保護一重臣之先聲懲討而一脉義理煥然復明危懼
之人心庶可因此而鎮安陷溺之世道庶可賴此而維持
苟非染跡於凶徒逆黨者則庶或不迷於定趨向之方矣
況我 殿下以英睿出天之資闡經傳義理之蘊凡在繼
志述事之方崇儒重道之誠節財慎賞之規遵典革弊之
政莫非義理上出來則義理二字實是今日出治之本也
當此大有爲之時故宜上下凝神勵精商確乎廟謨講究

乎民瘼以恢光我 先大王遺大扶艱之業而徒以醜類
之云存公車日積臺紙倥總上而 至尊疲於應接下而
言官趨於波蕩朝著之鎮靖無期時象之和平未易 殿
下如或念及於此則亦將惕然奮發亟賜處分以致一世
維新之美矣古聖有言曰大勇者義理之怒也伏願 殿
下更加三思以義理之大勇而攘除醜類以義理之大勇
而掃清區宇則宗社幸甚臣民幸甚

擬疏

云云嗚呼水旱之災堯湯不免先儒所論氣數之適然者
理或然也亦不可專歸之於氣數而不盡在我之道也伏

念我 聖朝重熙累洽國泰民安似無召災之端而旱魃
之肆虐經旬彌朔上而貽厦氈之憂下而絕畎畝之望其
故何也三事之臣未盡變理之功而然歟百僚之官未盡
代工之責而然歟天道遠遠固非淺識設見所可揣量而
以董子天人甚畏之說觀之或不合人事之有所未盡而
以致上天之眚警也就周詩雲漢章言之其所謂山川滌
滌如焚如惓等語不啻若今日之旱而其所以濟生靈於
靡孑之餘能成中興之業者實由於宣王之遇灾恐懼飭
身修德之致也今日弭灾之道不過我 殿下一心上轉
移之如何耳絲綸懇惻爲民之誠至矣圭璧旣卒事神之

禮備矣而冥應漠漠淒淒烈烈終未得桑林千里之雨臣
於此莫究其由也我 殿下憫旱自修之方靡不用極有
寃者必伸有罪者必有罔圉重囚咸得疏釋嶺海偏配殆
盡放還而其中近幸追奪數人尚未蒙復官之恩夜臺之
下想有向隅之歎斯豈非天地之大猶有所憾者耶夫罰
及泉壤初非 聖世之美事而思推幽明可致兩間之和
氣伏願 聖明穆然渙渙發德音則天心悅豫而可以
致洪範時雨若之休矣云云

啓

論正言朴宗彥啓

癸巳九月二十四日

被彈反罵實非 聖世之美事而曾有前後飭教蓋出於
杜後弊勵廉恥之盛意也朴宗彥以不稱臺職至招人言
則其在處義固當順受巽辭以待公議而乃於自列之章
顯有噴薄角勝之言殊無嚴畏朝著之心此路一開後弊
難防且渠之情勢既不可以無故人自處則何敢贅及他
說揚揚論人以爲塞責之計哉其所以放倒廉恥縱恣無
忌莫此爲甚如此之人不可置之於耳目之列請前正言
朴宗彥改正臺望

詣闕避嫌啓

臣才識魯莽言議巽劣本不合於清朝耳目之任而栢府

職命忽下於私次病伏之中試隸儼臨不敢言私冒沒出
肅而臣自來情病萬無供職之望略陳微懇亟付草草一
言矣及承 聖批以過也過矣再三爲教臣誠惶慄悚惕
罔知攸措夫臺閣言事之道不可以小節而不論銓地取
人之方不可以微官而不擇故果有引義刊汰之請故官
譴罷之論矣致有此悔責之備至此莫非臣人微言輕不
能見字於君父之致臣何敢一刻晏然於臺次乎請命通
臣職

序

送李生子東歸錦湖序

夫逆旅乾坤聚散有數離合無常聚而散散而復合離而合合而復離者天道人事之常也自余之南遷邈邈天涯初無親朋故友之相隨而幸得吾子於禪房寂寞之濱雖無平日雅分同是湖西之客也一面如舊襟期相照自託忘年之交或講論經史或琢磨詞章或吟風詠月共寓息鄉之情自不覺契好之密勿而信可謂窮途之樂事也萍水光陰再變冬夏吾子以定省之久曠修彩服理擔簦棄我而去忽忽別懷不啻若南浦之遠送也雖然吾與子俱是湖右之人而始得相逢於南天窮海之地者可見聚合之不偶也且不能作伴好還於春風而作此殊方之別者

盖由離散之有時也乍聚而旋散乍合而旋離都付於天
道人事之常然則安知既散之後無復聚之時既離之後
無復合之期耶噫吾子之擺脫世累離違萱闈千里携笈
三年磨杵可尚其立志堅固加人數等而刮目真工裴然
成章是所謂虛往實歸而較諸此老明時見逐飄泊於炎
荒風霜之域豈不相越之遠迥哉吾人交道貴不相忘秋
闌折桂之辰或可念及於山房團圓之時歟吾家距君邊
未滿一宿之程幸於省勤之後匹馬尺童躬尋栢峯弊廬
見吾弟吾兒而細報此翁平安之消息也

記

杏亭記

梧根山水之勝名於湖西而其中林泉之靜僻溪壑之窈窕惟杏亭爲最亭之西有山名鶯嶺而烟霞瑞光長繞於山之頭亭之南有川名鵲江而湖天

缺八字

所謂落霞與孤鶯齊飛秋水共長天一色是誠盡得此亭之勝槩也惟我先祖自京退休筭室於茲手植三株杏樹於楓岸絕壁之上至今稱之以杏亭而荒臺豐草綠葉密茂秋月霜風黃顙離離宛然有前賢之遺跡而不讓於王氏三槐之堂矣古老相傳而悲吟行路指点而瞻仰子孫之居生於亭下者豈無追慕之忱歟歲癸酉之秋吾兄弟

採蓮聯壁還榮之暇會宗族於是亭管絃方張杯盤狼藉
酒三行有一宗人執爵而言曰今日之遊樂矣而亦有所
愀然於心者蘇氏族譜之序曰以一人之身而爲兄弟以
兄弟而爲路人終至於喜不慶哀不吊今此同席之人原
其本則乃一人之身也世代寢遠情誼漸薄若使散在他
處聲聞阻闊則勢將喜不慶哀不吊而自歸於路人之域
矣惟幸居相近而情相通族愈疎而交愈密又幸而有科
慶之生光於隣里宗會之序行於舊亭則惇睦孝悌之心
宜其油然而生矣凡茲同祖之人曷不勉哉指山而問焉
曰某山乃吾先祖之所陟觀也指水而問焉曰某水乃吾

先祖之作酌遊也指杏樹而言曰某樹乃吾先祖之所手
種也念念不忘於吾先祖山水遊觀之地杖屨盤旋之所
而有時團會以叙親親之誼則庶幾無忝爾祖而有顏色
於是亭矣宗人皆曰諾要我誌其言而爲之記至今追思
僂作數十年舊事旅窓寂寞之中不勝感傷之情略綴短
篇以寓眷顧之意而繼之以銘曰蔽蒂杏樹勿剪勿伐我
祖所爰蔽蒂杏樹勿剪勿敗我祖所憇蔽蒂杏樹勿剪勿
拜我祖所說

東臯亭記

我東名賢之稱東臯者非一而吾先祖櫟翁公獨泯沒無

聞於世是豈學術文章有讓於他賢哉蓋緣生丁不辰隱
居無悶苟全性命於亂世不求聞達於當時而子孫陵替
未能顯揚其先祖之令名也櫟翁公以豪傑之姿透天

十字

文章足以華國而性本跼蹐時際

缺九字

櫟翁取其散木無用之義也自梧

根移寓等精舍於歌孔村之東以爲講道遊藝之所有臯
穹崇平臨曠野湖山之勝林泉之佳實高人盤旋之第一
名區也後背鶩嶺前對鵲江而洋洋乎山水明麗者東臯
之勝景也松軒光風竹戶霽月優優乎嘯咏自得者東臯
之閒趣也春夏觀稼秋冬收藏而百口無飢一室怡愉者

東臯之滋味也以經國之策而施之於家庭則子孫有繼述之美以濟民之道而行之於後進則人材有成就之盛一時親舊家少年風趨影從負笈擔簦有如七十子之服孔子者殆過數三百人鴻儒之輩出科甲之並曜聳動於遠邇門人作東臯亭賦有曰懸絳帳於河洛山中來之成市者非阿好之言而英材教育誠得人間之三樂矣先祖晚年所吟詠若干篇名之曰蹈舞集而自序曰爲我子孫者克遵吾志東臯烟月展讀此卷則吾將瞑目於地下不慙則視我如路傍一朽骨也其垂戒之意極其峻嚴矣其在肯構之道當世護遺亭莫墜家聲而零星族人不堪貧

窮終使先祖杖屨之地長埋於茂林豐草之間其爲愴感
倘如何哉眇余孤窮出脚風塵未遂田園之計而方作嶺
海之跡其爲得罪於先祖極矣枕林三秋慢想東臯之風
月而荒辭數行以寓歸思之寂寞云爾

慶餘齋記

昔我先君常勉戒余兒輩曰吾人之禍福殃慶只在於天
而天所以禍之福之殃之慶之者實由於吾人之或善或
惡耳吾家自太師樹績於勝國而有濟師之功逮孝靖顯
名於我朝而有愛物之心綿歷數十餘代之間世世積累
之德可驗於譜牒所載家傳忠孝世守仁敬八字矣然則

吾身以孤露之命

缺四字

安享清福者非吾之心德也

乃祖先之

缺八字

桂耀門自取榮進者非由

汝之才能也乃祖先之

缺十字

祖先之餘

烈而益修其德則將來之慶亦得有餘裕矣爰築一小齋於栢峯之下而名以餘慶蓋取易繫績善餘慶之義也齋之傍有一壑風烟之可愛使子孫肯搆而食德則乃吾家之慶也齋之前有數畝田園之可耕使子孫肯播而食力則亦吾家之慶也前擁後挈好見玄曾之成行者慶餘齋之所望也左圖右書不墜詩禮之舊業者慶餘齋之所期也先人之廢廬猶存先人之遺命不忘而五六年來喪威

存臻禍殃相繼無乃不肖迷矇莫追祖先之舊德而然歟
天道杳茫或爽報應之常理而然歟抑亦造化翁假之以
患難危厄而以爲玉成之地歟嘗聞邵堯夫之詩曰災殃
秋葉霜前落富貴春花雨後紅以雨紅之花而或爲霜落
之葉以霜落之葉而亦將爲雨紅之花是乃天理之自然
而其所以爲花爲葉都在於天人一心之天矣若使吾身
動以忍性益勉祖先之嘉謨無改先人之遺志則安知其
一時窮厄反爲來頭之吉慶耶於此尤覺慶餘名齋之遺
義也旅窓泣血而爲之說

歌孔村小記

昔者夫子有言曰里仁爲美擇不處仁焉得智我先祖櫟翁公始卜居於歌孔村蓋取夫子宅仁里之意而村之以歌孔爲名者何哉夫村之西十里許有小魯村之東數十里而顏子山曾子川以其地名之偶合而錫之以嘉號使村童野老詠歌孔聖而復慕於千載之下者也然則東臯松亭青衿遊藝者乃孔門之左右侍闈也鵲江烟月春風嘯咏者乃孔門之冠童浴沂也追鯉庭學詩學禮之訓而舊業不墜於子孫襲大聖過化存神之妙而美俗相傳於閭巷蕭條荒村宛然有闕里之遺風則歌孔之名信不虛得矣顧余不肖遠離鄉井瘴島經年絃誦久廢家山千里

詩書相阻寂寞旅窓謾發夫子乘桴浮海之歎將何時還
歸故里而與村翁歌詠自適放山水之間歟懷思無聊記
而誌之

論

王褒嵇紹孰賢論

論曰臣之道忠子之道孝孝移於忠忠本於孝孝者吾知
其爲忠忠者吾知其爲孝孝固無讓於忠忠亦不下於孝
矣雖然孝在忠先忠在孝後孝之至忠雖未著而可移者
有其本後雖有忠而先喪其孝則其忠也無本惡可以無
本之忠擬之於可移之孝乎昔者晉武帝以抗言殺王儀

以膚受誅嵇康皆非其罪也儀之子哀痛父非命恥臣於
晉室孝也康亦有紹而委質事君卒死於難忠也忠於君
則臣之道得矣孝於親則子之職盡矣君父居在三之極
忠孝乃百行之源則等不可以差殊觀也先儒氏齊稱並
美之論此其所以發歟以余觀之哀之孝足以當紹之忠
紹之忠不能無愧於哀之孝矣以哀之孝移之事君則爲
紹之忠非所難也以紹之忠求之於孝則與哀之行大相
遠焉權衡之論焉可無輕重哉君父雖曰一體而有父子
然後有君臣則前後異焉忠孝雖曰一理而孝於親然後
忠可移於君則終始分焉方晉之殺二子父也二子爲二

父之子非王臣也所當盡者子職而已生我者父也撫我者父也昊天罔極者父也我未嘗食君祿也衣君衣也出入君門也義理無間於情何如也父未嘗有罪而君殺之君者天也固不可讐也父者亦天也天亦可忘乎哀痛慘怛之懷宣止於棘人之藥藥哉泣血終身坐不西向三徵而不起七辟而不就者非敢讎君也自不忘其父也竭力而事主忘身而效忠非不能也父死非罪又從而仕之君子之心有所不忍也一篇蓼莪三復流涕則父死之後莫非哀慕之歲月其肯食其祿衣其衣出入君門乎偉元之孝可謂至矣嵇紹亦人子也以父得罪屏居私門則其與

王褒隱居教授者似矣一聞山濤之語幡然就徵何其慙也其曰扈衛乘輿死以之紹之於君則可謂忠矣蕩陰三敗百僚奔竄以身衛帝死而不避節則高矣臣之於君子之於父彼以其孝我以其忠則蕩陰之忠固無足愆也惟其不可者始仕耳苟使紹痛父之死非其罪誠如褒沒身悲號念念不置則提兵衛帝之日此正坐不西向之日也蕩陰死難之前不過爲晉室之具臣在乃家則忘其父者也臣之道未盡而子之職先虧當此之時忠與孝俱亡矣惟其迫於難然後始得爲之忠者孝所移也嵇紹之忠不知其何所移而爲之耶始旣忘父之死就享其榮卒若

視君之難而違避則進退無所據安足顧也吾則前日就徵之悔爲紹今日之痊疾而來此蕩陰之忠也忠有餘於君而孝不足於父爲臣則得矣爲父則未也豈可以一心全孝終始善處者比并哉且裒之孝乎親如是則今焉不避其亂者特孝中之所從來也夫豈難哉噫侍中之血濺帝衣而帝勿浣之紹之所感者人也偉元之淚看樹而樹爲之枯蓼莪之詩門人遂廢裒之所感者天也人也二子忠孝之淺深至此而可見矣而先儒氏援而比之曰殊音而并美矣愚則曰韶盡善盡美也武盡美未盡善也二子之忠孝似之矣

孔明不事獻帝論

論曰去就之勢靡常而事君之義無二可以去可以就審其可不可之勢使不苟於吾之去就而其所以輔扶之忠翼戴之義默寓於舍此就彼之中則君子不以其不事者爲無義也愚於孔明見之矣炎靈告替大盜據鼎龍卧南陽若無意於當世者而及遇劉豫州之顧幡然而起鞠躬盡瘁死而後已後之論者孰不以不事獻帝爲其累也哉愚獨以爲不然孔明終始爲漢者也終始爲漢則事昭烈乃所以事獻帝也人徒知孔明之不事獻帝而不知其所以事之之意已在於不事之中則非知亮者也當時之勢

不在於帝而在於昭烈則勢之所在亮之所就也當時之義在於昭烈而不在于帝則義之所在亮之所事也何其明其然也凶孽盜弄時君暗弱老師無策宿將斂手囂然管樂之意都付於長嘯抱膝之中而終無所施於世則孔明非無意於帝者也勢不能也就之既無補而輕身妄投之譏將不免於荀文若之一轍則潔身之士所不爲也而舉義興師紹復先王之業獨有大耳之胄耳殷勤懇切之意眷眷一往再往三往而可與恢漢業可與復漢祚吾志之不得行於帝者可與之行吾志之不得施於帝者可與之施焉將欲合天下忠義之士除君側之惡回赤帝之業

此亮之心亮之志也則其起也爲昭烈也爲昭烈者爲漢
室也爲漢室者非所以爲獻帝者乎終始皆爲獻帝而非
爲昭烈者也故位號之上不在於豫州首事之日乃在於
鄣南聞變之後亮之心至此驗矣嗚呼事昭烈乃所以存
獻帝也不能存帝於帝而反欲存帝於昭烈其勢誠可悲
而其情誠可哀也賞罰之權夫子不與周而與魯謂夫子
無尊周之意可乎惜乎事漢未幾將星遽隕爲帝之志雖
勤而爲帝之績莫效時耶命耶使假之數年得遂其討賊
興復之志則亮之爲帝效忠無疑矣大抵觀人不于其跡
而于其勢而已于其義而已尊帝之勢不在於帝而在於

昭烈則舍帝而就昭烈者非所以舍帝也可就而就之可
事而事之亦莫非輔扶翼戴之義故曰去就之勢靡常而
事君之義無二也

子死不哭論

論曰可愛非子乎人莫不溺於愛可哀非死乎人莫不盡
其哀愛之深故其死也哀哀之至故其哭之痛此人之常
情也然徒愛而莫知其子之爲惡者非愛也徒哀而不恤
其子之不善者非哀也是以人之能愛其子者雖哀其子
之死而異乎人之哀也哀其身而哭者哭之淺也哀其心
而哭者哭之深也身死可哀而心哀爲大哀哭之宜痛而

不哭爲大痛何必舉哭呼哀然後謂之哭哉昔者魯有文伯死而敬姜不哭文伯其子也敬姜其母也哭死而哀者母子真情之所不能已也可哀而不哀可哭而不哭豈慈愛之道有所亾滅而然耶夫人之於子也惟疾之憂尤憐愛其子者婦人之情也況於死生之際其哀也如何而能忍人之所不忍者豈無其由也哀人之所不哀而哀之於不哀之中哭人之所不哭而哭之於不哭之間則慈愛之深者莫敬姜若也何以明其然也敬姜賢婦也敬姜之於子愛而能教者也知孔子之可事而使之事則不慈而能如是乎孔子去魯而其子不從則子之不善已可知矣內

人號哭閨女自裁所厚者婦人而已則子之用心不亦可
哀乎敬姜之愛子也如此而其子之不肖如彼則其心陷
溺斲喪無餘未死之時亦如旣死之日哀莫大於心死而
哭常切於平生不待哀死而已哀於未死之前不待哭亡
而已哭於未亡之先是故其死而不哀者非不哀其死也
哀其子之不若人之子而不敢以人之哀而哀之也其亡
而不哭者非不哭其亡也哭其心之不若人之心而不敢
以人之哭而哭之也然人雖不見其哀而哀之藏於內者
有甚於人之哀也人雖不見其哭而哭之存諸中者有甚
於人之哭也哀之見於外者不若藏於內哭之發於聲者

不若存諸中則其所以不哀者安知其大哀乎其所以不
哭者安知其大哭乎古之人云戲笑之怒浮於詬辱長歌
之哀甚於痛哭敬姜不哭非如是耶難者曰才不才亦各
言其子也臨喪而不哀宣人情乎曰不然敬姜之哀知所
哀而哀之敬姜之哭知所哭而哭之也哀其心之慙亡故
不暇哀其身哭其生之所爲故不暇哭其死何嘗若衆人
之徒哀其身而不哀其心徒哭其死而不哭其生乎然則
苟子之不肖其死可以不哭乎曰有敬姜之賢則可矣無
敬姜之賢而效敬姜之爲則其亦忍人也哉

堯不誅四凶論

論曰好惡者一人之私也賞罰者天下之公也是故古之聖人先天下之惡而惡後天下之怒而怒者所以明一人之私而行天下之公也昔四凶在堯朝而堯不誅之及舜卽位然後四罪而天下咸服嗚呼堯宣不知四凶者執於此可以見聖人之至公至明而能服天下之心者又何者堯大聖人也舜亦大聖人也以聖人之好惡操天下之賞罰宜無所不服者然罪惡未著於天下而誅之則非天下之誅故至於罪大惡極天下皆誅然後始以天下之誅誅之堯之明能察於未著之前舜之明能察於已著之後故好惡在人而賞罰公行於天下是以堯之不誅四凶吾不

曰堯而曰天下也舜之誅四凶吾不曰舜而曰堯也夫知四凶之惡者堯也知堯之知而誅堯之不誅者舜也堯之誅在於不誅舜之誅在於必誅誅之心者深誅之身者淺天下徒知服舜之誅而不知堯之所誅者在於舜之前也何以知之象恭之誅已行於若采之問方命之誅既見於僉曰之舉聖人之誅迹於言辭之間而天下不能窺測覆載之量也宣待於流放竄殛然後謂之誅哉大抵聖人之賞罰一於天而已故天下以勸以懲苟或見一善則輒賞之見一惡則輒罰之不以天下之公而以一人之私則善者未必皆賞惡者未必皆罰惡能服天下哉夫天之於人

未嘗有賞罰然雷霆之下莫不畏怖者以其怒之有時也
使天而失其時日以轟於上則天下之人未必畏怖而褻
其威矣故有雷霆之威而待其時者堯之所以爲天也有
雷霆之威而得其時者舜之所以爲天也然赫赫之威本
於蒼蒼之中怒與不怒在人而已天豈有二心哉嗟夫後
之人君以一人之私而廢天下之公賞一人而天下不信
罰一人而天下不服是狂雷暴霆徒駭於天下之耳目悲
夫

射殺花藥夫人論

論曰按宋太祖平蜀納花藥夫人于宮昶妻也帝惑于夫

人而夫人造毒爲患者數謀鴆帝也帝獵于苑中夫人在傍晉王佯爲射獸而遂射夫人論曰晉王之射花藥夫人者爲已除患而已非爲太祖也何以明其然也晉王太祖之弟也金櫃之盟雖成而傳之於子固三代之法則當是之時晉王之心將恐將疑惟畏人之或間而已不得立也彼花藥夫人者雖曰夫人觀其始至於宋把筆帝前述其亡國之由而歎無男兒恨其不知慷慨辭情隱若烈士早使夫人得豫蜀謀則昶雖暗庸國不遽亡此晉王之所親見而此乃八宮密侍帝傍則安知傳與之心不以夫人言而或變也金櫃之盟不以夫人言而或渝也晉王之心有

疑乎此其所以晝息夜度欲殺夫人之念未嘗食息忘也而其未能焉者以其在帝之宮中也一朝夫人從公于狩晉王之心以爲失今不殺後悔莫及是故彎弓而射之蹀血於帝前略無顧忌彼豈無顧忌之念哉必殺之心勝也除患之計急也說者謂妲己亡夏褒姒滅周哲婦迷人古今所患太祖惑於夫人而夫人又有造毒之事則晉王之所以射殺者爲帝而射也爲國而射也曰此晉王之所以爲幸也夫晉王果有爲帝之誠爲國之念則上帥諸弟入告于內下帥百僚交陳於外具陳夫人之罪而請遠之則太祖之英明其敢愛一女子乎曾無一言及此而乘間乃

發至於刺刃此晉王之爲己除患也明矣且夫夫人自蜀
歸宋爲帝嬖姪則夫人之心雖未忘蜀而宣有身爲嬖姪
又生造毒之意乎此亦未必不出於晉王加罪之辭也大
抵晉王之一念惟在紆兄之臂而奪之也方其嚮弓而注
矢也擬射禽獸而乃射夫人是時夫人在帝之側使其失
毫釐或差則將及於太祖之身也然則晉王之所以射禽
獸也乃所以射夫人之意也其所以射夫人者乃所以射
太祖之兆也是以射之之心潛滋暗長而燭影之變血濺
御屏德昭之死出於非命以至於開室之喪亦不爲恨吁
晉王之於太祖一何薄耶是不過急於自爲之計而有此

殘忍之行也噫嫂溺不援孟子謂之豺狼夫花藥夫人既
爲太祖之宮人則是亦晉王之嫂也一有憂患之心則射
殺而無疑晉王果不同於豺狼乎答曰晉王以花藥夫人
在蜀而蜀亡歸宋而帝惑以此爲憂而射之云爾則此又
遂晉王之過而非原情定罪之論也甚矣晉王之心也欲
防後日之患而射宮人於天子之側嗚呼晉王其亦忍人
也哉

人力可以奪造化論

論曰有詰於我者曰天下萬物莫不有一定之理得於初
者不能變於後也局於始者不能變於終也是以人命有

夭壽而夭者不可壽也國祚有長短而短者不可長也氣稟有聖愚而愚者不可至於聖也而先儒乃曰人力可以奪造化此何以稱焉我應之曰蒼蒼而位於上者天也而天之所視常自乎我渺渺而處於下者人也而人之所爲能感於天天人一理上下無間故在我之道旣盡於下則在彼之造化自不能違矣夫所謂造化者何天而已矣人之命或壽或夭者出於天而能盡修養之道以至於延年則造化可奪也國祚之或短或長者出於天而能盡懋敬之實以至於永命則造化可奪也氣稟之或明或愚者出於天而能盡自修之方以至於爲聖則造化可奪也然則

造化之理豈不以人力而奪之耶客曰否夫物之不齊物
之情也人之壽夭不齊而衰旺之說斷於命生之初國之
長短不齊而世年之卜在於定鼎之始質之昏明不齊而
上下之品不移於稟賦之後若子之言則有生者皆可以不
死有國者皆可以不亡庸下者皆可以作聖而自古及
今人無不死之人國無不亡之國聖賢之生於世也若是
其不類何也以人力而奪造化者果如是乎我應之曰若
子可謂睹其影而不察其形齊其末而不揣其本者也信
以爲能生養者可以夭死乎能敬德者可以易亡乎能修
身者可以終於下愚乎凡人之得癩疾者百無一瘳而唐

之孫忠邈則屏去嗜欲頤養精神故不惟己其疾亦能延其命終至於百有餘歲國之多灾異者未或不危而若商之中宗周之宣王嚴恭寅畏恐懼修省故不惟消其灾亦能壽其國終至於數百年若人之氣稟初雖昏蔽而力於進學勉於爲善柔者以強昏者以明自中人而進於上智自凡人而進於聖人則向所謂奪造化者是耶非耶有不養生養之必至於引年有不敬德敬之必至於綿歷有不修身修之必至於作聖以人事而回天理者昭昭矣程子之意斷可知矣嗚呼保身莫善於寡欲延壽莫過於清心節宣得宜調護盡道則命之夭者可以壽也享國在於懋

敬祈天本於誠民奉若天道無替厥命則祚之短者可以
長也乾乾夕惕孜孜用力人一而已千下學而上達則質
之昏者可以變也此豈非以人力而奪造化者耶噫子之
所慎在於疾湯之所敬在於德成王之緝熙光明在於學
君子於三件事蓋亦盡其道矣然則奪造化之道實在於
人力易曰以杞包瓜有類自天期其至矣詰者唯唯而退
謹掇其辭

史記在山川論

論曰文章之氣脉亘乎天地之間可以包括山川者也故
有文章之才者必得文章之氣礪文章之氣者必得山川

之助而山川之氣卽文章之氣也文章之氣卽山川之氣也然則文章之氣山以之助乎川以之助乎山不期乎助文章之氣而自不得不助乎文章之才川不期乎助文章之氣而自不得不助乎文章之才何者有若文章之士壯遊於流峙之間而收攬乎山川之氣則文章之氣脉雖包括乎山川而文章之斧斤實不在乎山川而已昔馬子才以子長遊贈蓋邦式曰子長之文章不在書學者每以書求之則終身不知其奇予有史記一部在名山大川壯麗奇怪之處將與子周遊而歷覽之愚甚惑焉夫子長乃文章之士而有文章之才者也旣得其文章之氣用於文章

之境而收拾乎山川明秀之勝闢發於實錄國事之際故其爲史體橫放不羈而雄勇猛健焉斬絕峻拔焉夸放而浩漫焉溥瀟而淵渙焉則子長之史在山乎哉在川乎哉焉知其不在於名山而名山之氣適有助於子長之史乎焉知其不在於大川而大川之氣適有助於子長之史乎蓋子長之史人巧極天而於山取其斬絕之氣以助書法不隱之體於川取其浩漫之氣以助直筆揮洒之勢自至於見名山者見其史而必謂之在於名山觀大川者觀其史而必謂之在於大川則子長之所以得史之體者不在文章之才而惟在於山川之氣乎何以明其然耶馬子之

言曰欲學子長之爲文先學其遊可也信斯言也子長之史非有在於文章之才而實有在乎山川之氣也若曰見九疑之綿邈巫峽之嵯峨然後其文妍媚而蔚紆則其可以子長之史果在於九疑巫峽之間乎觀夫子之遺風彷徨乎汶陽洙泗之上然後其文典重而溫雅則其可以子長之史果在汶陽洙泗之上乎其他變化出沒如萬像從四時而無窮者無一不出於盡天下之大觀然後吐氣而爲文則亦可以子長之史果在於山川之氣而其才可以爲文章其氣足以成文章然後其爲史也偶在於觀覽之旣富矣非子長之才足則乎山川之氣而子長之觀盡取

其奇偉之壯則山川之氣惡能有助於子長之史乎然則一部之史在山川而果不在於子長乎在子長而不在於山川乎山川之氣助子長之才而爲史子長之才賴山川之氣而爲史則山川之氣顧非史記之所在而子長之才實關史記之所在也直以史記果在於山川奇怪之處而無預於子長良史之筆則山自山川自川而止耳豈可謂史記之所在乎嗟呼子長之史可謂史乎史而自秦漢以來未有如太史之才者則山川其舍諸而不爲之助其氣乎今夫山一拳石之多而及其至也草木生之貨財殖焉則其所以草木生之而貨財殖焉者乃山之所以爲山也

以是而謂史之所在乎今夫川一勺水之多而及其至也
魚鱉生焉寶藏興焉則其所以魚鱉生焉而寶藏興焉者
乃川之所以爲川也以是謂史之所在乎以是觀之子長
之史自在於山乎自在於川乎非史之自在於山而自在
於川則史記之於山川其無所自在乎史乎史乎隨所在
而在山焉斯在川焉斯在則可以知史之所在矣史記之
所在者其司馬遷乎是以古人贊司馬遷之才曰聖乎文
者也又曰六經以後便有司馬遷云爾則向所謂史記在
山川者是耶非耶愚不知史記之在山川也雖然徒恃其
有文章之才而不知其助文章之氣則名山之氣雖峻極

于天而無以爲文章之所助也大川之氣雖瀰瀰于地而亦無以爲文章之所助也必須歷覽乎山川而以助其氣然後蘊之爲三長之才發之爲五難之體矣意者子長之史雖不在於山川而其實猶在乎山川也史不在茲乎愚聞諸詩史曰斧藻江山有所資然則史記之所以在山川者宣無所資而然哉愚故曰有文章之才者必得文章之氣礪文章之氣者必得山川之助矣

義

素履往

吁愚嘗觀山火之初九曰責其趾舍車而徒於此可以驗

天澤初九素履往之義也何者山火之初九以剛陽之德而在於下者也其修飾之道在於正其所行故舍其非道之車而安於徒步此豈非素履往之義乎天澤之初九以陽剛之才而可以上進者也其所貞固之道在於守其本分故安其貧賤之素而往以素履此豈非舍車徒之義乎然則履初之安其分者乃賁初之賁其趾也賁初之舍車徒者乃履初之素履往也推此以究則向所謂素履往之義可以晰矣請申之夫素履者雅素之履也陽剛處下素位已正而去就無苟白賁爲義只存有爲之志而初無冒進之意則於其上進之時行以卑下之素者非素履往

之象歟何以明之貧賤者乃在下者之常分也富貴者非
在下者之常分也飲水乃吾之常分則列鼎之富非吾分
也徒行乃吾之常分則結駟之貴非吾分也得位行道雖
是君子之所欲而素履則不可舍放出門之初也得君進
身雖是賢者之所欲而素履則不可去放發軔之時也是
以紉履之尊重非吾所榮而所履者素履也珠履之華美
非吾所羨而所履者素履也緩步而當車者吾之素履則
可用放有爲之時也安行而合道者吾之素履則可取放
登進之時也素履而往則赤第金舄不足以累其心矣素
履而往則千鍾萬駟不足以動其志矣素履往之義章章

明矣大抵上天下澤履之義也去文尚質履之義也而履者相隨放行步之際不可復更去身者也履之初九以陽居下不干於陰累此所以爲潔素之履者也陽剛之才不可終於下則當進於上而於其進往之時失其卑賤之素則恐難免妄動干進之患矣其所以安其常分守其素履者豈非君子重足容之道耶蓋嘗論之君子行己之方無往而非素履故中庸曰素其位而行素貧賤行乎貧賤素富貴行乎富貴素患難行乎患難此莫非素履往之義也然則簞食瓢飲不改其樂者所以行貧賤之素也紆衣鼓琴若固有之者所以行富貴之素也公孫碩膚赤歸凡凡

者所以行患難之素也義經之旨尤可驗矣嗚呼孔子之
循路孟子之環轍志在救世而其往則以素履也伊尹之
就湯呂尚之至周志在得君而其往則以素履也納履於
言行之違者何莫非往素履之道也脫屣於功名之累者
亦莫非往素履之義也吁履者禮也而素者無文之謂也
禮以質爲本故言素於履之初爰而責之上九恐失其本
真故必言白賁乃所以文之極而反於質也其所以白賁
無咎卽此之素履往無咎者歟

曲禮

吁禮云禮云何以名曲有曲尺者裁度長短莫不均齊則

取其曲尺之曲而名其禮歟有曲水者溯洄左右莫不流通則取其曲水之曲而名其禮歟禮云禮云何以名曲噫禮者天理之節文而人事之儀則也曲察乎天理而節文之曲盡乎人事而儀則之其言之著於文字章句之間者無不曲暢矣其辭之詳於次第節目之中者無不委曲矣然則雖非曲尺之曲而長短廣狹均齊方正者禮之所以爲曲也雖非曲水之曲而左右前後流通旁達者禮之所以爲曲也推此以究則記所期曲禮之義可以晰矣請申之夫曲之爲言乃委曲之義而非回曲之謂也曲禮一篇節目甚詳彙倫事物之則無不備載日用常行之法無不

記著三千其言委曲萬端則名以曲禮不亦宜乎何以明之夫禮者所以束人之筋骸而釋人之回邪者也君臣父子兄弟朋友之倫非禮則無以明其倫矣長幼男女尊卑上下之序非禮則無以正其序矣欲明其君臣父子兄弟朋友之倫而苟無經文之節目委曲則何以垂法於後世乎欲正其長幼男女尊卑上下之序而苟無編簡之條理詳盡則何以作範於衆人乎是以古之聖賢作爲禮經言行之表裏精粗莫不記載於經文之中物則之大小輕重莫不著錄簡編之間節目焉曲折細密條理焉曲盡無餘則苟非一曲字不足以名其篇矣然則直道以行者禮之

用也而名之以直則非委曲之義也直言以訓者禮之文也而稱之以直則非曲暢之義也名之以曲而直在其中矣嗚呼禮者治身之器也杞柳杯棬之器或方或圓各適其用者有若禮之吉凶內外曲當於義理也陶冶鍋釜之器或大或小各稱其量者有若禮之精粗巨細曲合於情文也溪路千重之曲猶不如是禮之秩秩有序隨處曲盡也江流萬折之曲猶不如是禮之井井不紊隨處曲暢也至此而曲禮之義尤可驗矣吁經禮三百曲禮三千則經禮者言其大經大法故其目至於三百此所以名之以經也曲禮者言其至細至密故其條至於三千此所以名之

以曲也經與曲命名之義非知禮之君子何足與論也

乞言

吁鹿鳴之詩曰示我周行蓋所以乞言於嘉賓也噫君臣之分朝廷之禮一於嚴敬則情或不通而無以盡其忠告之益故先王因其飲食聚會而制爲燕饗之樂以通上下之情飲食以饗之琴瑟以娛之筐幣以將之其禮意之厚如此則庶乎人之好我而示我以大道也講聖人之道德談先王之禮樂相示以道者豈非乞言於嘉賓者乎然則養老之禮不啻若娛樂嘉賓也袒而割牲其敬至矣冕而玄衣其儀盛矣彼老人之就養於東序者亦必有嘉言善

謨可以報答其厚禮也於其禮盛樂備之時必乞嘉言善
謨於黃耆白髮之前者與鹿鳴示周行之望無間矣推此
以究記所謂乞言之義可以晰矣請申之夫乞者求乞之
謂也言者善言之謂也詔諏善道人君之事開陳善言老
者之責則於其養老之日求乞其善言者豈非古聖王尊
德樂道之誠乎何以明之夫年之高者其德劭矣有其德
者必有言矣多聞前言往行者老人則當其禮養之日必
有可陳之言矣能存博識強記者老人則當其忠養之時
必有可聞之言矣是以於其養老之禮爰有乞言之舉論
道經邦言之善者以是言而乞於老人濟世安民言之善

者以此言而乞於老人前聖德業之盛或可言之於今日
歟以是乞之先王教化之美亦可言之於今茲歟以此乞
之其所乞言可謂至矣由是觀之虞夏殷周皆有養老而
虞夏殷則隨其老人之自言而記之而已至周而始有乞
言之禮斯豈非制度文章至周極備而然歟抑又論之夫
鄉射鄉飲大射燕射之禮皆有旅酬合語之規則而況養
老禮之尤重者也其可無乞言之盛舉乎食之以禮樂之
以樂將之以實求之以誠者所以致殷勤之意而使老人
樂告以善言者也老人不必以飲食幣帛爲悅而所感者
禮樂之克備也王者不必以飲食幣帛爲足而所盡者誠

敬之實心也老人感禮樂之克備而不諱其可行之言王者盡誠敬之實心而以乞其可用之言則可謂各盡其道矣嗚呼齒者天下之達尊也六十杖於鄉七十杖於國八十杖於朝取其杖於鄉杖於國杖於朝之義而有三老五更之設矣虞人養於庠夏人養於序殷人養於學合其養於庠養於序養於學之禮而有四簋三豆之饗者不過尊高年之意而苟無乞言之禮則是徒養而已非所以愛其德也乞言之義尤可驗矣吁伯夷自北海之濱而歸來乎善養太公自東海之濱而歸來乎善養以文王之盛德想必乞言於此二老矣

許嫁纓

吁女子之許嫁矣爲而纓焉噫結縭者迎妻之禮也結帨者送女之儀也雖未行結縭之禮而許嫁則已繫於所許嫁之人其可不施以纓而示其有所繫之義乎雖不及結帨之儀而許嫁則已屬於所許嫁之家亦可不繫以纓而示其有所屬之義乎然則許嫁而示其有所繫之義則反其將嫁可以行結縭之禮矣許嫁而示其有所屬之義則迨其已嫁可以見結帨之儀矣推此以究禮所謂許嫁纓之義可以解矣請申之夫纓者所以繫也女子已長乃許其嫁則縱未行禮而其身已繫於男子矣縱未于歸而其

身已屬於夫家矣其所以結其經纓以示夫有所繫屬者
不亦宜乎何以明之夫適人而從夫者女子之行也有家
而託身者女子之道也繫絲之日雖無所繫而適人之義
則已具於繫絲之日矣弄瓦之時雖無所屬而有家之願
則已切於弄瓦之時矣二十而嫁乃古制而許嫁於二十
未及之前則自此而繫其身於所許之人矣日月而嫁乃
常禮而許嫁於日月未告之前則自此而屬其身於所許
之家矣是以旭朝之雖鴈未鳴而其身則已有所繫故于
以纓之以示夫有所繫也吉士之野齋未包而其身則已
有所屬故于以纓之以示夫有所屬也此所以纓於許嫁

者也。蓋嘗論之：織、絰、組、紃，能盡女紅之青；然後以之許其嫁矣。酒漿、醢醢，能知主饋之節；然後以之許其嫁矣。必敬必戒，無違夫子之方；已講於許嫁之前矣。無非無儀，以宜家家人之道；已著於許嫁之辰矣。且夫詩有歸妻之詠，則以夫家爲其家，而將歸焉，豈不有繫屬之義耶？易有歸妹之象，則以舅家爲其家，而將歸焉，亦豈無繫屬之義耶？其所繫纓之義，尤可驗矣。嗚呼！季路之結纓，所以示守正之道也；孺子之濯纓，所以示自取之義也。至於女子之繫纓，雖與結纓、濯纓取義不同，而飾之以月露之繩，繫之以織女之絲，則豈不有光於閨梱之間乎？吁！許嫁而笄者，成人之

道也許嫁而纓者繫屬之意也父母之側猶佩纓香則將適新人豈無所以表之也同室之鬪猶爲纓冠則將宜其家豈無所以識之也纓乎纓乎不讓於雜佩瓊璜之垂綬矣

常視母誑

曲禮

吁昔孟子幼時問東家殺豬何爲母曰欲啖汝旣而悔曰古有胎教今適有知而欺之非教子之道也遂買豬肉而食之此乃禮經視母誑之義也噫教子之方罔不在初於其童穉之時或有欺紿之事則是喪其真實之德長其詐僞之習終難免扞格不勝之患而亦安知無夫子未出正

之言也是以孟母當日殺猪啖汝之言乃戲之耳只有戲
言而終無其實則非以正導迪之道故翻然悔悟買肉而
實其言孟子之德器成就爲世大儒者非但賴三遷之教
而其蒙養之功實基於買肉之日也斯豈非後世教子之
懿範乎推此以究記所謂常視母誑之旨可以晰矣請申
之夫誑者詐僞以欺之謂也教導幼子之道以誠而不宜
詐也以實而不宜僞也初不欺之以詐而以習其誠亦不
欺之以僞而以養其實者乃常視母誑之義也何以明之
人子之幼也知慮未長心志未固飲食言語之際一從父
母之所導居處出入之間只從父母之所訓於此之時或

示之以詐僞之事則回邪之心以之而生矣或示之以欺
誑之舉則浮靡之習以之而成矣是以古之善教子者必
在於幼稚之時飲食言語之際養之以正而示其不可欺
之方居處出入之間迪之以誠而示其不可誑之意念茲
在茲所常視者毋誑也誘之掖之所常視者毋誑也禮經
之義尤可驗矣抑又論之孩提之童必愛父母者乃良能
也赤子之心無僞純一者乃良知也因其良能之性而示
其誠實之道則可以成就其德性矣順其良知之性而示
其正直之方則可以薰陶其美性矣苟或示其一事之僞
誑則童子何知認其爲當然之事矣苟或示其一言之欺

給則稚子何識而信其爲誠然之言矣良能之暴棄未必不由於一事之僞詐矣良知之牴牾未必不由於一言之欺給矣此所以常視毋誑於幼子者也嗚呼毋自欺者君子誠身之道則宣可以欺人之術示其幼子乎誠者君子正心之工則宣不以誠正之方導其幼子乎以母自欺之道示之於童幼之時則今之童幼將爲他日毋自欺之君子矣以誠正之工示之於稚小之年則今之稚小將爲他日誠正之君子矣吁君子教子之方亦多術矣能言而教之以數與方名能食而教之以右手男女不同席而教之以禮飲食後長者而教之以讓者何莫非導迪於幼稚之

日乎而況示以母誑俾誠其意者乃怡養性情之第一先務也小學愛親敬長之道大學修齊治平之道實本於示母誑三字矣

說

鳥雌雄說

夫禽鳥之不辨雌雄者多矣白鷺之白白鵬之白同是白也未知誰爲雄而誰爲雌也黃鸝之黃黃鳥之黃同是黃也未知何者雌而何者雄也獨以鳥之雌雄難辨詠於詩出於聖人之言者何哉噫鳥之爲物至微而至靈者也夜啼知有赦反哺稱其孝但渾然同黑雌雄莫知啞啞其聲

說

不可以聲而辨之玄玄其色不可以色而分之或以爲右
翼高者爲雌左翼高者爲雄而亦非真的之言也宜雌黃
萬古作一疑案矣以人事觀之聖狂賢愚之判淑慝邪正
之分乃天地不易之正論而時級漸降世道混淆冰炭同
器而好惡無常薰蕕共傷而臭味難分不啻若鳥之雌雄
則詩人憂世之念純臣戒君之言安得不發於今世也雖
然雖不知鳥之雌雄而不知中自有真雌雄雖未知事之
是非而未知之中自有真是非在人之黑白分明則何患
乎物之雌雄之不辨也在我之經渭自別則何憂乎人之
是非之相混也旅窓寂寞聽鳥啼而戲爲之書

祭文

遣仲兒告親山文

嗚呼哀哉忠孝二字人道之常綱而俊訣 聖明留名於
罪籍之中不肖之不忠大矣久違松楸鎖跡於炎海之濱
不肖之不孝極矣人生斯世俱失忠孝之道則何可一時
假息於覆載之間哉又有刻骨之冤窮壤之痛惟其幽宅
不吉之說雖由地家難信之言而家內之詢謀僉同則有
所不可中止者矣顧此天涯茫茫世事悠悠既不得拚號
於靈樞出地之日哭隨放靈輻卽他之時而千里遠程尺
書又阻未聞某月某日某水某邱之消息自此以後永作

倫紀之罪人嗚呼痛哉流離顛沛世業莫保失所遑遑百口無奠接之地窮途栖栖一身有填壑之慮天實爲之不必提告以憾我父母之靈而如或覆盆回光枯骨生肉生還故土一哭墓前則人間之至願可畢不然則歸拜承歡於地下不過早晚間事不肖微誠庶或俯監於冥冥之中矣嗚呼哀哉

月城山祈雨祭文

代本倅作

亢旱亢旱迄今幾月其雨其雨杲杲出日若此不已民將靡了虐魃肆暴胡至此極百里魚喁是誰之責受人牛羊亦當求牧分憂百里我將安適境內山川圭璧旣卒奔走

東西一心焦灼嵩高月城爲鎮斯域祥光瑞輝遠通若木
神明所凝靈異自昔人皆仰止庶冀冥隲七齋三沐敢此
禱祝白茅丹忱牲酒且潔赫赫啟靈盞垂矜惻招邀雲師
詢謀風伯油然沛然降以霈澤興我枯苗潤我黍稷三農
無失萬民同樂莫非神賜孰不頌德至誠所存庶幾歆格
觀仙窟祈雨祭文

桑林緬邈雲漢昭回旱魃肆虐聖世爲灾山川滌滌中
谷乾推田疇龜坼秧苗俱摧大命近止下民其哀分憂百
里兢紫霆雷先禱社壇次祈頭輪一心虔誠百神猶嗔乍
雨旋霽我憂如焚洪爐天地望霓望雲冀垂冥隲靡神不

舉觀仙邃窟龍靈攸處主張造化揔攬端倪環海成湫爾
安其棲興雲作雨神變不測油然沛然實在頃刻旣居茲
土倘念我民赫赫厥靈盡訴彼旻今來太守卽汝主人闔
境民物依仰一身爾若有知誠宣不格牲醴載馨圭璧旣
卒蜿蜿頽鱗監比微忱吹噓密雲降以甘霖百畝優洽四
野回青趁期東作庶望西成先我一邑遂及八坡宇內生
靈鼓舞春臺龍德正中厥施斯普冥應孔昭永譽終古

牛膝峙站舍開基祭文

奕奕金剛在城之北山麓南馳結爲牛膝通道于東使星
絡繹以送以迎肩輦必出候望之際人或露宿十里五里

四無村落哀我役夫何處投宿其來已久爲弊茲邑太守
有命肇營民宅倬彼山巔創我節屋一年二年望其成聚
將開厥基敢告神祇神之聽之以眷以佑勞來安集日增
月滋沐風櫛雨人免其憂一隅棠城百靈呵護冠蓋聯翩
有蕩其道鷄鳴狗吠相聞達四神其永保俾無後灾一酌
明薦庶幾格思

雜著

黑山日記

壬辰七月二十七日夜故首擬掌令蒙古八日早朝出肅
直房八診同爲入侍大司憲李彥衡大司諫沈頤之執義

李行源司諫李東顯持平李重馥詣臺同入大司憲通差
先退大司諫先爲合啓兩司傳啓訖大司諫略陳所懷仍
爲避嫌 上命今日臺臣并施削職之典皆退出矣九日
特敎掌令某黑島爲民持平李某楸島爲民有五倍道之
命辭敎極嚴分義惶悚蒼黃發行沈友衡仲借奴馬沈婿
子厚備路費聞戚從李兼之先待於青坡以南大門作路
兼之已往龍湖不得握別甚悵缺矣沈郎遂至西水庫江
上而告別正可謂黯然消魂矣當以果川作行而江水大
漲浩無津涯前路素沙等大川無可通之勢下船於凍雀
向昏而宿新院酒幕曉頭發行至板橋而馬蹄落鐵有難

前進仍朝飯而宿左贅家乃八月初一日也翌日午時當
竹山大橋大水之餘石橋毀壞水且湍募得越川人而利
涉秣馬於彌勒堂酒幕宿長楊申兄輝仲家初三日到鎮
川邑內官吏李次傑挽行進飯主倅李宜白出見驢行夕
時到梧根本家季兒以痢症呻吟長婦又有腫病諸孫兒
皆有些少病憂揆以情理實難離捨而嚴程有不可遲滯
初四日借楊生卜馬而發行長兒隨之太一驗金德老味
三奴陪行到邑底本倅金履遠出見驢行秣馬鷄山驛村
渡銅津而宿公州大橋酒幕隣村成生來見李承旨秀得
伴問儘行初五日早朝到營底見趙承旨喪人憲付桂谷

書朝飯於酒幕掛馬鐵而有蹇病或騎或步到李臺弘緩
家借馬至尼山而還之到沙橋得貴馬而乘暮到恩津道
谷李戚家初六日楊生馬留置道谷以貴馬作行未及十
里而雨秣馬於金剛酒幕冒雨作行到全州監營營底居
文啓米乃興德主人也本來饒居意謂有主接之道矣問
予邑人則舊時家舍已爲放賣寓於他人之廊云艱辛招
見則蕩敗無餘僂作乞人十年之間世事若是大變推此
言之非但下輩之貧富無常雖赫世權貴之家亦或有一
時換面者物理何足預料也遂往西門外酒幕宗人仁培
亦以謫行來留暫時接面而得一舍脫濕衣而留宿李大

諫基敬宗人在南門外而自黑島謫所出來未久故使長
兒往候其季氏燕岐基性來見方伯洪樂性伴問借驕馬
優給路費及行具長兒欲爲隨至黑島而非但行中添口
之無益家間病憂病室不可不念故曉喻而與太一還送
別懷難抑初七日食後發行路傍蘇川有宋生遂大曾是
親舊人見之饋飯贖行宿泰仁邑酒幕興德倅吳濬根方
遞歸宿邑底伴問知其謫行之所由然後乘夜來見叙其
同鄉之意恨其歸橐枵然不得厚贍蓋曾經臺侍被謫之
人無論知與不知路傍守宰之隨力顧助自是古規而近
來守令之延接謫客或有現露生事之弊故人皆厭憚初

不相問雖相知之間先問罪名然後見之世道之難可勝
歎哉八日秣馬於長城彌勒堂距蘆嶺下五里也蘆嶺峻
急且險舍馬而徒流汗沾衣艱到山頂望見南天萬疊峰
巒行路迷茫而北望京國五雲何處鄉山自此而漸遠罪
累踪跡不知止泊之所耿耿孤衷不覺哀淚之沾巾矣纔
到酒幕命僕秣馬旅舍極其精潔行路初見遂解衣而卧
適有一人行色藍縷形容困苦兩班之無依飄泊者也見
吾之匹馬行裝頗有健羨之色余曰措大之身勢雖極窮
困而東西南北任其所之不猶愈於吾之風霜顛沛不知
死所乎其人顧而笑遂促裝宿長城邑內酒幕前正言宋

樂以耽羅謫行到此病情方苦云雖無面分窮途相問人
情當然故往見之初九日曉發長城行至三十里長興倅
李普溫方遞歸遇於道班荆而叙寒暄有贐物秣馬於南
倉而到羅州適值空官下人舉行之道或恐生事於渠輩
殆同驅迫催行亦可見人心之不淑矣監營人馬已爲還
送得賞馬發行時日將暮矣行至數里馬弱且惡幾乎落
傷不得已暫住於路傍蝸屋使本官將校尹東一賞得他
馬而來冒夜作行秣馬於馬雲牧酒幕而到潮落浦津頭
初十日因夕潮乘船望見潮水漲滿於天際諸島羅列於
眼中招船人而問去路所歷諸島有曰智島鴨海島蝦印

島陸島多里島高崖島虛沙島草亂島紫雲島岩泰島八
金島濕沙島安昌島鰲島朴伊島半月島珠島牛目島長
山島上台島下台島下海島晚山島薪島大野島都楸島
飛禽島水治島沙治島星峙島牛耳島黑山島凡三十餘
島而其餘小小所見諸島不可盡記蓋島之爲字從鳥從
山諸島之列於浦口者或大或小如鳬如鴨太半島形所
以島稱之者也黑山以西洪魚島又泰蛇島楸島乃彼國
接界之地也所乘之船乃小漁船也甚窄搖盪且有腥臭
身甚不平平日炫燁之症恐懼之心欲發未發精神迷亂
終不安定俄有一船來泊問之則乃安興鎮船也乃移其

船而乘之頗有廣濶安如平地遂泛于中流蘇仙赤壁賦
所謂浩浩乎如憑虛御風而不知其所止飄飄乎如遺世
獨立羽化而登仙者此也遂枕藉乎舟中順風西下夜將
半而西風乍起水勢不順招舟子回船舟子忽大呼曰舟
掛於岸而將傾入水矣舟中之人倉黃顛倒而下岸僅將
卜物步行數里許有人家問之則乃梅花島也喚主翁借
屋而入時鷄初鳴矣主人進粟飯十一日因潮水發船午
時下岩泰島乃羅州地也島人之護送罪人自有規例而
所帶本州將校不無討食之弊村人各具一床進白飯有
數品魚蝦而下輩則皆粟飯蓋島中昨年飢荒滋甚今年

則雖免凶而新穀未登貧乏方極云矣因以陸路作行或
擔草輜或路險處步行至數十里岩峯島周回凡三十餘
里人家連續櫛比皆爲殷富古有設置雲海府使之議而
未果云蓋設府於此島而以羅州諸島附焉則可爲關防
之地而未知緣何故停止也遂就都將家而宿使將校先
往促船於八金島十二日早發渡一津至八禽而朝飯發
船到飛禽島而宿蓋乘船凡三日也羅州將校之稱以水
站傳食於諸島者於渠有利然島民弊端自古成謬例亦
可歎也十三日早潮發船望見海門之近北無邊者乃去
中原路也黑水西河可以達矣稍近南而有茫茫海門往

黑山路也諸島到此皆盡而水光接天望見天外有山突出乃牛耳島也自古罪人皆配此島而非真黑山也黑山別將在於此島故通稱黑山而真黑山則水路又將千餘里云矣是日風勢雖不惡亦不順波濤沍湧茫無津涯半日之間僅達牛耳望見山下村家人人出望想見久謫之人憂愁鬱悒而疑其謫客之又來欲聞世間之消息者也其情憾矣遂下船而主接於許姓人家蓋此島據於大海之西所謂上山寇峯最高於諸島而向東開局山皆石角巉岩頗有明麗之態前有案山極其秀麗以防海口天所以別設一區以爲罪人福堂者也自古謫此者或有名賢

或有鄉相迭相往來者無非京華之人由此而居民文物
異於諸島號稱半京可驗地理之鍾靈矣村家僅爲七十
餘戶而但生利鮮少土地瘠薄居民之所以生活者只以
農作爲業而凶年頻數雖曰海島魚鼈極貴決不可以樂
土言之矣至於風氣之惡雖異所聞而但三夏則瘴氣尤
甚或有不辨天地之時云矣今則秋風乍動天日明朗無
異陸地但蠅蚊之屬有所難堪矣十四日驗金告歸不與
羅州將校同行則必迷歸路故不得已發行付諸兒及從
第書又因李正言奴付書於京中舍第及沈郎到此窮途
遠爾作別宜有奴主貴賤之別乎步出津頭望見驗奴之

乘船缺然之懷可勝言哉島中謫客通至四十餘人云而其中曾經臺侍者俞應教彥鎬俞正言恒柱李正言範濟也俞學士曾與其仲氏彥鑄有雅分故往見而李臺雖與家李有面分方在荇棘出入非僂不得見之明日乃秋夕名節故村人殺牛獻肉蓋島中初無皮匠衆人并力搏椎或驅於絕壁而殺之雖出於不得已而亦可謂之異域矣十五日主人獻數器祭饌蓋秋夕一歲之大名節也無論上下盛備酒饌以祭其先而島人風俗不如是或拘於貧乏而無乃薄於報本之誠而然歟監營所送二石米羅州主人載船而來十六日所住處甚窄向東半間退軒朝陽

難堪使監考斫取數枝木以爲遮陽稍可容息矣鳥中無
虎豹鹿獐之屬羽翟之族只有鳥鵲而鵲則報喜之鳥也
鳥則報凶之鳥也鵲爲鳥所啄而絕無來集但羣鳥亂啼
聲若呼監考則必有謫客之來物類之無知亦有相應之
理歟

海南日記

丙申九月十四日有海南縣勿限年定配之 命卽日發
行到青坡石隅酒店舍弟仲保沈郎子厚作別宗人光叔
適來京中而與泮主人鄭漢龍告別於酒店向暮渡江宿
僧房坪酒店路逢李生惟兼班荆數語而別十五日曉發

柳川朝飯宿振威邑內羅將池龍起追來十六日曉發成
歡宿天安酒店歷路見盆谷李婦而到酒店則查兄來坐
仲李兩兒亦自家鄉來而長兒則以求山之意往鎮川未
來悵然十七日還送李兒與仲兒及驗金發行到德坪驟
雨因朝飯冒雨而行暫入黔岩見外兄及諸從姪夕飯後
到錦江則長兒來候於津頭矣携入邑內酒店宿十八日
曉與長兒作別發行桂谷妹家不過二十里而末由相面
情理缺然使長兒往見傳此行消息抵尼城邑朝飯鄭寧
遠世桂曾有黑島同苦之誼聞此行消息備酒饌來見可
感到恩津道谷李鏡城本家見郎廳兄弟因留宿遺贐二

貫銅亦可感十九日到全州宿焉監司出巡未返無相通之道可歎監司卽李普行也二十日到泰仁而宿二十一日到井邑朝飯發行至興德因宿鄉廳及諸吏舊知之人皆來見遺贐異哉五六年內以謫行再入此邑也二十二日到茂長監司巡入此邑而亦無通知之路可歎二十三日到咸平而宿二十四日發行至務安二十里滯雨因宿亦舊知皆來見勸酒兼遺行饌二十五日到靈宕宿焉二十六日到海南配所入金巡將家有難僂之端僅留一日二十八日夕移接于安戶房家此乃卽黃正言謫館也住接亦非偶然夕羅將告歸付東谷書二十九日閑坐無聊

尹友幼平見訪尹友本邑白蓮洞人也中年來寓於清州
數年相從矣近來移寓於琰山而適來其從氏尹都事家
專此來訪以叙舊日之情稍可慰遠客之懷矣十月初一
日奴馬俱歸而驗奴曾於黑山之行往來服勤今且隨來
而歸缺然有不忍捨去之意非徒情理固然亦可見奴主
之義重也初二日尹幼平來話而去此日乃方水洞外冗
小暮也遙想千里之外心懷甚惡

此以下缺

附錄

行狀

公諱弘濟字元輔號柏峯姓李氏貫全義高麗翊贊功臣
三重大匡太師封全山候謚聖節諱棹其鼻祖也自是達
官聞人代不乏絕人 本朝有諱丘直戶曹典書以原從
勳 贈議政府叅贊有諱貞幹至孝年八十爲老萊戲以
悅母 世宗聞其行特拜資憲大夫中樞院事 賜几杖
御樂又手書家傳忠孝世守仁敬八字以褒美之後 賜
謚孝靖孝靖有五子李曰士惠官靈巖郡守聘按廉使金
公士廉之孫女因家于清州之梧根持身積學以光門戶

至宣祖朝有樸翁諱英吉中進士值光海數倫之時絕意仕宦教授不怠門徒七十餘人多有顯達者於公爲五世祖高祖諱耆某年司馬某年文科歷春秋館記注官外補海美縣監江原道都事曾祖諱命全宣教郎祖諱駿翼隱德不仕考諱宇鼎中樞府事妣晉州鄭氏鎮矯女有婦德公以景廟壬寅四月四日生聰慧絕倫早有名譽

英祖癸酉中司馬試李氏囂囂公與之同榜時人榮之翌年甲戌文科例付假注書丁丑除穆陵別檢自戊寅三年之間歷成均典籍禮書正郎兵書佐郎春秋館記注官宗廟署令興德縣監甲申拜司憲府掌令公曰職在言責

可以言而不言是負君也乃上疏請寢前大臣申益彬削
版之命而不見用公卽乞免不許丁亥拜通禮院通
禮己丑除江東縣監復以掌令承召公又乞免兼請釐
正祀典上嘉納之壬辰拜司諫院正言公陳疏劾順天
府使具采五務安縣監林鵬翰之貪賊又請正選舉不公
之弊又論申致權朴宗彥構捏反噬之罪並蒙允又上
疏勉進聖學兼論吉州牧使李邦鵬黃海兵使李國賢之
濫酷又請文蔭武三窠均宰列邑上優批賜虎皮而
教曰體昔年不諱之意七月拜掌令上詣昌德宮仍
詣毓祥宮公與諸臺合啓省被嚴譴竄絕島爲庶民公遂

有黑山島之命時以御樂不卽舉行掌樂正李晉圭甲山
投畀櫟泉宋公明欽以忤旨亦蒙削版甲午蒙放復叙
前職又疏論趙榮約不可不刊汰仕籍并請其時檢擬銓
官尹得養不可不罷去上疑其偏於黨論不允丙申

元陵賓天正宗嗣位公卽上疏極陳洪鳳漢罔赦之
罪又論趙榮約不可置於衣冠之列言甚切至蓋申前疏
未盡之意也上震怒復有海南勿限年投畀之命噫

上亦豈不知公言之公而爲慈宮地不得不如是爾或
者疑洪之罪不顯公之誅太過此不知公者也公之意蓋
曰借使當時謀陷東宮不出其手及到不忍言之地無

一言救解果何心也獨不愧壺關三老茂乎位在大臣反
不如高寢郎一言悟意乎是其心不過畏禍自爲身謀耳
惡得無罪然則世之論公者誰敢爲不是也于斯時也公
已老矣十年瘴海固亦甚矣乃夷然如在柱席愛君憂國
之心發於吟咏苟非所養有素烏可得乎其詩文壹是任
意寫出不事雕琢故往往有不合作者體然皆有根本尤
長於論說其排布力量多有人不及處豈可與尋常文人
才士同日語哉甲辰八月始蒙 宥方擬大用竟以其年
十一月卒明年乙巳葬于本郡機岩負西之原配青松沈
氏士人空之女賢淑有女士之譽生三男一女三男皆通

德郎長寅喆次寅珏次寅彬女適青松沈在賢寅喆生二男一女寅珏生二男寅彬生一男一女煥培行烈清風金孝淵妻長房出光培廷培二房出奎培星州玄永昇妻三房出鳴呼公學優而登仕輔弼之任指日可期乃以直言見忤終於微官惜哉余生長同鄉亦嘗聞公之名而不得詳其行今者公七世孫俊世持公遺藁及行錄來謁狀文公之本末於是乎可悉遂撮其槩書之如右云壬午二月日月城李鍾聞謹狀

墓碣銘

歷觀古史危忠苦節不在於貴戚大臣多出於庶官下僚

此千古志士所以於悵者也當升平之時富貴極一世苟
其所愛爵之賞之惟意所欲權傾人主及其有事雖全軀
保家是務置國家於相忘有人於此以直道而行不苟合
於人視爵祿如浮雲悅義理如菊藜故處下流而不怨被
斥逐而不悔由其所見明所守確也昔 元陵晚年倦勤
委任於時相專擅威福莫敢言者時柏峯李公以臺憲疏
覈之朝野肅然竟爲所中一謫于黑山島再謫于海南十
年瘴炎九死一生少不挫折處之恬如也 健陵甲辰秋
始有朝野相望風采祈其進用而大有施措是年冬以疾
卒于家嗚呼命也夫天不欲平治而民蒙其澤耶公諱弘

濟字元輔柏峯其號姓李氏貫全義高麗開國功臣太師
諱棹實其始祖自是世襲軒冕爲東方大姓有諱貞幹事
我 英陵官至知中樞院以孝聞 上嘉之 賜詔褒之
賜諡孝靖高祖諱耆文科春秋館記注官外歷江原道
都事曾祖諱命全宣教郎祖諱駿翼有文章而不仕考諱
字鼎僉知中樞府事妣晉州鄭氏諱鎮矯女也以 懿陵
壬寅四月四日生公公天姿英俊才性穎發文藝夙就遊
放場屋儕友皆推爲不及 元陵癸酉中司馬試甲戌擢
文科例付假注書丁丑除 穆陵別檢戊寅陞成均館典
籍己卯遷禮曹正郎庚辰移兵曹佐郎春秋館記注官辛

已外除興德縣監爲政廉明去後民見紀乙酉以司憲府
掌令召還明年補江東縣令治績如在興時丙申還拜掌
令自此拜掌令者十一其在憲府棘棘不阿遇事敢言不
彈強禦時相偏主黨論多悖義理公上疏極言其縱恣不
法狀忤旨遂遠竄黑山島纔有還言官猶連章構捏又竄
海南十年鵬舍備嘗艱險公慷慨之氣不沮於窮阨之中
健陵甲辰 上察其直遂放還蓋將進用也八月才還
十一月十七日卒享年六十三葬于清州之北機岩負西
之原配青松沈氏士人座之女賢有德孝舅姑敬君子禮
無違焉有女士之譽葵柎公墓舉三男一女長男寅詰通

德郎次寅珽通德郎次寅彬通德郎女適青松沈在賢寅
詰娶文化柳德由女生二男一女男燠培行烈女適清風
金孝淵寅珽娶昌原黃懋女繼娶平壤趙氏女生二男光
培廷培寅彬娶全州李大亨女生一男一女男基培女適
星州玄永升曾玄以下煩不盡錄嗚呼公早年爲學文藝
超衆以故先接蓮榜繼登龍門進途將大闢少與世俛仰
身致貴顯澤施當世固指顧間傾其高亢正直去就惟義
是視見權臣之眩亂國是者欲斥之如鷹鷂之逐鴛鴦疏
駁權貴不少回護以至流放窮海坎壇平生而不悔可謂
古之遺直也歟賜環未幾天又奪之速古人所謂誰之不

如而不公卿者爲公準備語也又何豐其賦而啻其壽如
神龍瑞鳳之暫見而旋藏人所見者只其片鱗零毛欲以
此而論公者不亦淺淺乎哉今來請銘者公之七世孫泰
世也係之以銘曰威武不能屈所擇之精也顛沛不祇悔
所守之貞也其身之阨其道之亨也嗚呼聞公之風者頑
廉而懦立其智猶可追其勇不可及直道以行其誰敢譏
百世之下視此銘石戊寅八月日崇祿大夫判敦寧院事
海平尹用求撰嘉善大夫前宗正院卿完山李明翔書

墓誌銘

故司憲府掌令柏峯李公

元陵名臣也忠言直節矯矯

著世垂于琬琰矣既卒葬之百有餘年尚闕幽誌其七世
孫泰世使其族姪鍾萬訪余於萬山石木之居屬銘焉顧
此舛陋遂巡不敢泚筆者多月屢踵門而請益固不能孤
其意乃按而叙之曰公諱弘濟字元輔號柏峯全義氏其
先麗朝開國勳太師謚聖節諱棹也圭組代襲爲東方大
姓八 本朝諱貞幹同中樞院天性至孝 英陵褒其行

賜几杖梨園風樂以設宴又以 御筆書家傳忠孝世

守仁敬八大字下之卒後 贈謚曰孝靖諱士憲郡守卜

築于清州之梧根始此諱耆文科春秋館記注官諱命全
宣教郎諱駿翼隱德不仕諱宇鼎僉中樞公之高曾祖禰

也晉州鄭鎮矯其外王父也公生有異質自幼才諳通敏
博學譟聲譽 元陵癸酉登慈榜甲戌捷文科隸假注書
除 穆陵別檢陞典籍歷禮兵曹正郎春秋館記注官又
移兵曹正郎兼 宗廟署令出宰興德縣治聲大播甲申
以掌令內移疏救臺臣削版之 命拜通禮院旋移掌令
除江東縣監威惠并行頌溢闔境未幾又除掌令承 召
襍被蕭然疏論 祀典釐正 上嘉納壬辰除正言 啓
劾順天務安兩邑倅之貪暴極論選舉不公繼劾誣罔傾
軋之人并蒙 允因勉聖學且劾吉州牧黃海兵使濫刑
虐斂之罪又請文蔭武通用除拜郡邑以弘志士之氣

上嘉之特 賜虎皮仍 教曰體昔年不諱之意公益感

奮骨鯁自任知無不言言甚激切論趙榮約之刊汰銓官

尹得養之檢擬循私 上疑其黨論久不 批羣凶因此

搆捏標榜朋比 上幸毓祥宮忽下 教曰庶孽之禁通

清自柳子光始因 激怒却湯劑蔡濟恭等請進御 上

曰予志已定若從卿等之請是子道不修仍叩闕曰蕩平

猶屬第二件事千乘浮雲矣叱咤之聲四字謂之名流可

乎諸臣皆免冠請罪 上感悟只 命臺臣李弘濟高黑

山島庶民蓋公積忤 上志故也聞者寃之 健陵改紀

始放還叙前職公瘴海風霜摧折之中僅得生還而忠愛

之心恒結肝肺因言事疏論洪鳳漢兼劾趙榮約不可置
諸衣冠之列辭婉理正上欲慰慈宮不得已遂有公海
南限己身定配之命甲辰蒙賜環上知公之忠直
將大用公遽以其年十一月十七日卒于家距其生景
宗壬寅四月四日享年六拾參惜哉葬于清州治北機宕
負西之原齊青松沈氏至女賢冠一族先公沒後合窆育
三男一女男寅喆寅珏寅彬皆通德郎青松沈在賢婿也
寅喆二男一女男煥培行烈女金孝淵寅珏二男光培廷
培寅彬一男一女男基培女玄永昇曾玄繁不記公生於
忠孝古家講劇義理已有所得且就學問而正焉直養為

工出以事君言人所難言放逐於前沉埋於後平生所學
百不一施此千古志士之傷感然蹇蹇匪躬之風鄉黨尚
有月旦霜臺必載遺直名不朽而日光玉潔矣又何憾焉
引宋名臣詩以銘曰去國一身輕似葉高名千秋重如山
天爲吾皇扶社稷肯教夫子不生還壬午八月日嘉義大
夫吏曹叅判兼弘文館副提學同知 經筵義禁府春秋
館成均館事 奎章閣直提學 侍講院檢校輔德驪興
閔丙承撰

跋

全城氏中葉之盛栢峯李公峭直能文辭以諫臣風聞朝
野沒而有稿在焉幾二百年其後承將謀掃塵而登梓齋
斷爛巾笥之藏謁惺菴宋文丈于鳳館講舍而得校攷訂
正剛粹爲略干局弁以冠首人家明仁志事於斯至矣日
其任寫人登魯委見余囑以卷尾語余愔耄以辭謝然亦
得參玩其疏本諷詠其詩什忠君愛國之心九死靡悔之
志何其彷彿於坡翁之鉄心石腸屈子之憂愁離騷也蓋
公以 元陵文臣遭遇聖明職縻華顯外駐寧城內掌臺
憲爲冠鶚立不畏強禦而彈劾權貴反爲所忤十年南荒

賦鵬而還朝陽鳴鳳形于封章藍關暮雪發於咏懷蒼白
不禁焯然丹心一直哉而已然則是集之美如崑岡之片
玉愈珍久後爬櫛若滄海之沉珠復出豈惟子孫讀之止
作青氈而敬守也使當公世遠播爲人臣之寶鑑也明矣
辛巳閏六月日平陽朴魯重跋

事有幸而爲不幸者有不幸而爲幸者然君子當論其命
義不問其幸不幸也吾傍六世祖柏峯公安稟旣異孝弟
行於家矣黽勉於功令之文幼而孜孜壯而大闡歷殿內
外牛刃恢恢及掌臺憲士望謫然人皆以爲幸而望其大
用公則曰得之不得有命存焉至於激濁揚清之際遇剛

不吐鷹鷂之志不少趙起竟爲權貴所中十年瘴海備嘗
百謫風波人以不幸吊之公則曰義之所在不敢不安公
之一生所爲無愧於心者故以幸付於命以不幸付於義
豈非身困而道亨者也邢平日著述諷詠甚富麗而不趁
時收葬至七世孫俊世始肱篋則斷爛散帙百不存一乃
就宋斯文惺齋丈謀所以存刪証校而余亦叅纂次寫謄
之役經幾朔而脫藁總二局付將付諸手民爲子孫共守
計或者天憫其久屈于前而欲伸于後籍此而得公諸世
使公之事蹟文字盡爲顯揚則世之可以言而不言使姦
佞得志不可以言而言使忠良見害而身爲鬼域者見此

則其骨不覺其已寒矣其爲幸豈少乎哉辛巳流火月朏
日傍裔登魯謹識

爲人臣而正直盡忠自古難矣正直則不動於禍福不動
於禍福則可以伏節死義有伏節死義之心然後可以爲
社稷之臣此漢武所以特許之於汲長孺而於弘青輩不
數焉嗚呼若我柏峯公者所謂有伏節死義之心可以爲
社稷之臣者非耶蓋洪鳳漢之惡浮於憲冀始之尚禧輩
釀成壬午大變終之其弟憐漢之沮遏乙未大策也皆爲
之窩主相簡恒烈之脅威恐喝亦罔非其使喚而在廷諸
臣懼其威焰噤不敢一言公以韋布散班上章請討至再

至三竟被反噬十載瘴海九死靡挫不有伏節死義之忠
而能若是乎我 正廟晚年社稷之重必有所恃而天遽
奪之甚可惜也雖然君子貴得正而斃焉公爲臣盡忠既
得其正其壽不壽於公何憾獨其忠言讜論發於章奏可
以爲後世人臣之法者今皆亡失僅僅蒐集止二弓又可
惜也然一臠足以知全鼎奚求乎多哉辛巳八月日族后
孫鍾萬謹識

疾風知勁草歲寒知松柏之後凋非獨物也惟人也亦然
蓋昇平無事之際則君子小人無以別惟疑危不安之時
則君子能自守其介而不奪小人則朝四暮三變態無常

矣以吾族祖考柏峯公之事觀之豈不信矣乎公當元
陵之際宵小蒲朝幻弄國權而公抗諫不已至再至三以
故大與時忤三年放逐黑島之日月漠然九載轉流海南
之風波遯矣然則其間所經歷果何如哉然其剛正孤高
之節終始不渝此非所謂疾風勁草歲寒松柏者耶歲月
浸久公之遺稿入於蠹魚所傷虫鼠所敗餘存者無幾矣
公之七世孫俊世懼其先集之湮沒無傳故採掇爲二冊
將付活字以壽其傳要不佞而識之履雖無似欽仰公之
遺風又重俊世之適追先德於是乎書壬午二月日族后
孫根廈謹識

祖先有懿行偉德而使之湮沒無聞於後則是乃子孫之大罪也觀曾夫子數西河氏可以鑑矣我七世祖柏峯公之精忠孤節已悉於諸賢之闡幽不必疊床而其章奏之班班可以爲後世人臣之法者寥寥任之虫鼠所噬爾來百有餘載則茲豈非我子孫之大罪不惟不免於曾夫子之誅抑吾祖在天之靈其肯曰有後哉不肖兄弟爲是之懼久矣而恒以事鉅力綿中夜飲泣者非一二數焉乃者家第俊世惕然奮發搜輯斷爛族叔登魯氏亦樂爲之相役幸得二冊誠不無千百十一之憾而一文足徵全豹凡我後孫庶可以知之矣壬午二月日七世孫泰世謹識

